

蘇魏公文集

萬靈著

蘇魏公文集卷五十七

宋太子太保右僕射同中書門下平章事司空魏國公蘇頌撰

逢年舜畊

裔孫萬靈錫經重祿

墓誌

晉爵耀庭

太常博士張君墓誌銘

太常博士張君諱大有字損之先世占數華陰自其曾祖諱圖避五代之亂於湖相因家潭州遂為長沙人祖某三世仕宦皆不過縣令州佐至君以天聖五年進士乙科一命為隨州節度推官翰林胥公偃薦監壽春茶場由明州推官改著作佐郎知河南澠池縣再遷太常博士河東都轉運使施公昌言奏辟簽書晉州判官公事徙知忠州過都貽書抵宰相陳恭公以為大臣當如古人推轂天下士徒以絕謝賓客取公名非是以此迕時而有司適言君在河東入羅不如法坐削一官監廬州酒未幾會恩還故秩最後簽書應天府判官公事是時予同在幕中接尊俎論古今從容談笑間以唱酬歌呼縱放纖介無所隱故尤相親厚嘗愛其為人疎爽豪健有志於功名文章議論足以自表一時所至上官賴其能委之以事

輒為平處其中無所私撓明州廣德湖灌溉之利由古然矣先時患民侵冒墾地太守李夷庚築大堤以限之歲久堤壞而冒耕者衆侵奪滋益繁轉運使移君往案視得故迹而復之於是人均其利而訴牒自息其在澠池建學校以延諸生又治縣解得二古鎊冶之以補其邑之刀矛器械於是戎器為之一新已而郭邈山盜起嘯聚陝洛間騷掠近邑獨不入澠境知有備故也留守范公雍喜其所為召見與語留數月不遣時久不雨邑之父老詣府訴災因請還君既歸而雨作民益歡然有龍騎卒自邊戍還過縣以事逗留不去民不知所為頗相驚擾君密畫計白府請捕治之卒伏辜而一道帖然君雖為小官每於朝廷政令大體意有所得慨然忘其躬之卑遠而敢言也故諸公貴人多所慰薦幕府交辟焉初河東行鐵錢君再疏極陳利害大略以官鑪有數而私瀉無藝恐終為民患自以言輕不足動朝廷又為歌詩四百言上之覬托民謠可以開悟於上其後果以不便罷嘗奏書仁宗請擇宗室之賢者建為皇嗣以繫天下之望御史中丞王安簡公得其藁而奇之欲以為裏行而君卒矣時皇祐四年八月某甲子也君既登朝贈其父國子博士娶同郡馮氏號仁和縣君繼卞氏永安縣君一男子曰聃舉進士嘗試於春官三女子適考功郎中鄭民憲進士周郁曹知微君卒後二十六年聃以長興宰

陳之才狀爲於子曰先人官不遇博士而壽止五十四曾不得少究其才志今將以某年月日舉君夫人之喪合葬於某山且念知先人之深無如公者幸一言以銘之遂爲銘曰

少而學兮將有爲壯而仕兮逢所知才信美兮生孔時命不完兮進則違屬風力兮排雲寬賈其良兮售不疑抗直論兮通天焯忽焉逝兮吁可悲

職方員外郎知秦州蔡君墓誌銘

錢塘蔡君子難以慶曆六年擢進士第起家爲應天府穀熟縣尉再調房州司法參軍監亳州酒稅移宿州蘄縣令改秦州觀察推官以銓課轉大理寺丞監建州都茶場再遷殿中丞太常博士監在京雜買務知開封府襄邑縣召充編修樞密院例策厯尚書員外郎以職方知秦州服父喪去位既外除矣以熙寧六年四月甲子寢疾終於家卜明年十一月丁酉遂葬富陽縣之仙山鄉瑞相原君年五十二諱某子難其字也少從安定先生胡翼之學經術尤長於春秋同門生丹陽姚闢嘗以三傳異議數十事探索其有無終日應答疊疊不窮闢曰安定之學盡於此矣及從仕則專意文法簿書之務纖悉彌密辨論上官前一無避憚至於不可屈而後已初在穀熟予適爲南京從事每見其邑文移精詳有理致屢持以白府

府中滯訟疑獄數以委之於朋僚中特親厚予嘗察其所趣舍操守甚悉且曰士之所以貴於學者蓋在適於時而有用也然古之人不患無時而患無知己者蓋欲其道有所信而不愧苟得耳予是以知其有志於事業而不為碌碌者也是時故相杜祁公退居睢陽君以文章謁之一見嗟賞待以異禮留守觀文王安簡公嘗謂君曰祁公時所欽屬數道吾子之美子其勉之君既遇知己益自慎重由是當位者多稱薦之自酒官至編修凡七命皆從郡舉非由有司選擬也今叅知政事王公北都留守文潞公太師張丞相故相梁侍中翰林沈文通樞直何公南皆所薦者而襄邑實用子言領命梁公張公又以秦庭嘗僚連薦儒館之職朝廷再籍其名矣樞密府爵賞威刑之出動循故事國朝百年已行草案所謂例者以萬數或一事數例或徒具文而無定論異時引用去取往往先出吏手故前後繼擇才能士付之編輯有年數矣君至則區別類例日料十數事質於諸公著其可行者為令其重複無用者一切刪置甫四年而就緒凡得四百餘帙其別有開寶兵目暨驛馬令又被旨兼檢閱英宗一朝樞府故事送編修實錄院書成再奏御詔賜金幣仍改五品服章以寵前勞特陞秩一等留俸再任會御史言省冗官者編修其一也而君前此以便親請外官以得海陵矣因謂同僚曰此局必不應廢未幾

二府置屬官並兼編修條例如其言治平四年秋夏國主秉常遣使朝貢京師官稱不與常年類既錫宴則欲敘官就席君時為押伴毅然責以屬國陪臣之禮當偃蹇若是耶其使慢息遂坐上丞相聞之皆曰善治郡政尚嚴整事無劇易一出於已每慮重囚則燕居審訊盡憫愍求其所以生之或諗曰彼罪當辟欲生之其可得乎既不能生之徒引日月何益也君曰獄情至隱難見一成不可復今使之辭窮且知無枉則使者與吾兩無憾矣民有坐教令毆人而過誤致死者情得獲讞於朝刑寺疑非實然再移旁郡又移別路皆不能易初劾一辭卒從末減議者乃知其下無冤民也於時農田使者督察郡縣求民疾苦而興置之君預條其利害可行不可行者待其至使之財擇上不違新書期會下無擾民趣辦之弊人便其政至舉州邀憲臺願再留君三年以終其賜監司第課為淮南諸郡最君既明於世務而慷慨敢言為編修時樞府諸公嘗詢以兵要輒隨問啟畫深見聽納故留在職最久當時臺閣文雅之士亦多與之游接而善聽其論議若毗陵錢君倚臨川裴如晦陳留孫聖塗並稱其才適時用然方一施之州郡其效已見使之年且久則其風力必復有過人者耶父諱某以君登朝洎郊霈恩三遷太子中允賜緋衣魚袋其卒也集賢校理劉君贛甫為之銘矣始中允君在吳稱善士能殖生

產教子弟至君而棄其家事篤志於學問家之餘資常推以賑親戚之不能婚葬者平居不妄出入與過從者亦寡或問其故答曰省事遠怨於已足矣所為文章論議尤多自集為四十卷藏於家其配曰仁和縣君同郡孫氏女也生男子二長曰彥輔舉進士次曰彥弼齒始稚矣女子一一適永康縣尉邱沆一幼未從人去十年以朝郎典近州不為不遇也今日之疾革矣念今相知莫如公厚如不朽之事敢以為託予色然顧其笑談如平生無他苦但勉以自力而去後二月果有訃至乃知其神宇數定不怛生死豈力學信道之有素者歟後又得其孤洎壻之狀請銘以成逝者之志義不得謝因為之銘銘曰

君生錢塘氣溫質良佩服儒雅周旋吏方君善富陽仙山故鄉神藏既固澤施彌長名在士林惠留海旁載辭遺後刻此陰堂

工部侍郎致仕掌公墓誌銘

許之郟城有儒學之老曰尚書工部侍郎致仕掌公諱禹錫字唐卿起布衣取進士第補吏州郡以外臺保任試四才俱優改大理寺丞故觀文殿學士丁文簡公薦為侍御史故相杜正獻公薦試學士院帖館閣職凡仕四十六年年七十五由

太子賓客遷貳卿謝事還里中居二年而卒自結綬訖掛冠公私未嘗有小過失以壽終鄉閭君子以為行完而福茂宜有銘矣惟掌氏先出任姓黃帝之後魯有大夫黨氏者其別祖也黨掌音近故後世以掌稱而著者二族其一居琅邪曰掌同仕晉為顯官一居燉煌曰掌據前燕時封遂興侯公琅邪之裔也世占齊之禹城曾高以來未有顯者皇考諱宣始以明經起家官至殿中丞贈其父諱廷暉大理評事殿中君既仕而徙家郟城因著籍其邑及公貴累贈戶部尚書公之始官歷蘄道二州司理叅軍改秩知亳州鹿邑滑州胙城二縣通判安并二州知廬州未行留為御史出提點河東諸州刑獄公事入館閣以兵部員外郎為集賢校理以刑部郎中遷直集賢院兼崇文檢討至光祿卿改直秘閣兩為三司度支判官徙判都憑由理欠司出省管勾國子監判司農寺同判太常寺兼禮儀事公少自刻厲力學以進取既為吏則益持其操檢故所居以幹廉聞倅并州日故太子太傅李康靖公自杜正獻公相繼為守為之稱譽於朝由此名益顯景祐四年冬并忻地震民墊覆而死者什二三公以朝命案視其處賻死者而矜生者人用安輯其為御史論事務大體而略細故方是時元昊反大議入討公疏歷代禦邊周宣薄伐為得漢武遠討為失且言為今之畫宜省騎兵增步卒以固圍於內然後誘



諸羗籍其衆以侵擾於外不二三年狂敵之頸可坐而羈係矣明年三月有黑風  
晝晦冥之異公援鴻範傳五沴侵陵之說以為此應西賊蓄銳必圖內侵望勅守  
臣先事為備未幾賊殺金明羗帥李士彬覆其族而去公請急遣使者持璽書存  
拊其餘衆其援兵不救者望正軍法以固諸羗之心通判延州計用章坐逗撓軍  
事下獄流嶺南既而經略判官田京尹洙亦坐叅謀失律降通判公合諸御史共  
論其事以謂用章之貶所以重者推劾盡文法之過也京等之責所以薄者特旨  
本明恕之恩也幸徒用章內地則仁恩之施溥矣用章卒得放還又論舉邊任官  
同罪非是曰親民錢穀之吏所以同罪者責其廉隅也用兵之法或使貪愚豈皆  
清方之士望令舉者但保明其材武則翹勇之人皆出而為用也其為提點刑獄  
奉詔募河東民為宣毅兵得二萬七千人調鄉民為義勇得七萬二千人皆教以  
兵技不數月而軍律用明繫公課責之嚴也慶曆二年冬大河冰合邏者曰敵騎  
旦夕徑度矣朝廷患之命公護役疏鑿即時通流邊人賴之觀公之言與其施設  
豈特不為者然以刻意儒學不喜外官頗用此留滯終老文館而中心裕如也讀  
書無所擇經史之外至於五行星厯占筮地理百家之說世有傳者無不鑽鑿推  
求略習皆通藏書萬餘卷猶患不足月購歲閱志不少怠嘗謂緡討書傳最為樂

事一有會意如得奇貨人知其如此故求怪僻難知之事以窮其學之深淺公皆推本其自出以示之有未見者累日尋究至忘寢食必得而後已故當時士大夫多以博洽推之雅為陳恭公器重當國日嘗召至中書謂曰上知君有學問故授以祭酒之任它日被旨與故翰林王公洙同撰皇祐方域圖志既成五十卷上之王公奏略曰並是掌某討論辨證非臣敢冒均其能仁宗面加褒語再命繪圖置便坐繼有金紫繒幣之賜是後刪修地里新書重纂類篇補注神農本草編撰本草圖經公皆在其選三為開封府國學發解官所試詩賦論題必擇奇真人不經意者由是士子望風畏憚至目為有難題掌公然考覈精審得人為最多故將作監丞楊寘令直集賢院孫覺皆其所取解頭也再為殿試編排官預賜御書文儒考校字即日上詩稱謝優詔獎答其著述藏於家者文集二十卷晉陽刀筆六卷郡國手鑑一卷周易雜解十卷公為人疎闊與人言率直無緣飾初不知者謂為矯偽久而乃察其誠心無他也性至兢慎居常惴惴恐若有失在朝二十餘年非疾病慘恤未嘗移告當朝趨日則聞鐘聲而起未辨色而立馬闕門之側所莅官局不以劇日必一往雖祁寒盛暑大風雨雪率以為常非公事足不履權要門歲時禮慶則先至一謁而罷僕史知指是日往往不戒而集其舉動有常如此奉已

廉約衣服飲食一如布素時家無妾媵躬操几案之事人或訊其刻苦公亦不為改平生篤好推命之術自撰周易流演遁甲圖一卷以言人生受天窮通一出於命毫髮不可逃嘗推已之見生演其說為一卷曰年庚寅月庚辰日乙酉時壬午當易之歸妹困震所謂初中末三卦者也以世應飛伏納甲五行軌析數推之卦得二十五少分三卦合七十五年餘半祿秩算數休咎盡於是矣夢奠之前出其書以置枕旁遂易簣馬後予取而視之雖不盡通其說然所書乃公中年時手筆推考始卒益不謬焉嗚呼可謂信道術而能委順者耶公四娶周氏張氏盛氏危氏而盛氏故太保文肅公之女危氏故翰林蒙之孫女逮封內黃郡君先一年而沒生五男世基世京並早亡世康和州防禦推官世程太常寺奉禮郎世衡大理評事七女子五皆從人而亡一適殿中丞文彥璋一適某軍節度推官劉翥孫十四人而五已仕子孫皆傳家學勤吏事以持守其門戶積善之慶於是乎見矣公於先人天禧中進士同年也而某自皇祐以來辱在館閣接公几研且十餘年又得與世衡為姻婭故諸孝嗣以紀述見屬義不得辭比葬之日以斯銘納諸壙中蓋熙寧元年八月某日甲子也其地則汝州鄉何延原先塋之次也其合祔則四夫人之柩也其銘曰

士所以學貴乎博通潛心聖賢稽求大中得其本原治心養性探其枝葉保躬完行有如唐卿其志於是淡洽羣言沈酣衆藝既仕臺閣亦履通班不祈苟進卒老編研人謂之迂曰吾所好人譏其陋曾不改操今亡矣夫餘風可導來者不知斯銘以告

光祿卿葛公墓誌銘

葛羸姓出阜陶後以國為氏或曰與琅邪諸葛同族至漢晉有顯者仙翁稚川皆以道德稱於時時人以為神仙其後世居丹陽公益丹陽之系遠祖自新安徙新定至今為建德人祖贈太常丞諱某寬厚樂施悉以先世田宅推諸族人獨營郡之東山甲第以延接士人賓客使諸子從學焉父諱昂由進士起家為興化軍莆田尉充館閣校勘終尚書祠部員外郎集賢校理累贈戶部尚書公諱闕字子容少年以名家子挾藝文一上擢天聖五年甲科當時士大夫之知者即以世職期之景祐中予初涉場屋見公以文編贄先公先公謂某曰此該洽士爾宜從之游自是相與往還情好莫逆故其出處闕閱得而悉之慶曆二年先公知貢舉與諸同僚奏辟公為點檢試卷官時故叅知政事吳正肅公亦在貢部知公尤深既而合當塗貴人數公列削稱薦召試有日矣而以蒙山之累止得升秩初公嬰建陽

陳氏故太常少卿直昭文館商之女殿中侍御史洙之妹赴官蒙山道梧江暴得瘴屬發狂自溺陳宗意其護視不如方死非其所自嚙南奪二從婢歸榜掠以求寃狀卒無彷彿殿中為之左右寬譬親意終不可解會御史張頻出為本道轉運使將案其事而無可驗者因謫公所部賣買小不如法坐是免官其後公卿間皆知出於摭摭為上章論辨者又數十人幾三十年而大司徒魏國公方當國尤以為枉遂得滄滌敘緋衣銀魚不閤薦舉法然有薦監司者垂得移旨復以前累而議格遂卒不偶馬公始解褐為大理評事知信州上饒縣親獲強寇當改服章以不欲自言而止尋徙知蒙州既罷官監在京樂密庫出知婺州蘭溪縣移知化州轉本寺殿中丞太常博士通判常州歷尚書屯田都官職方三曹員外郎郎中用召試恩堂除知江陰軍始至以鹽寇梗江濱奏增黃淡落流二巡檢以搤賊衝因事召其黨類謂曰捕吏既密犯則不可解矣若輩有田者可以歸耕游手者可以易業眾以信服犯者為稀少及代去有唐興者率江民市黃柑綠橘越境外以謝公使鬻之為歸糧又口占五字詩以遣之且有佩犢帶牛之勸明年積潦害田自午卸堰至黃田港徹大江四十里大議疏導料民丁充役募里豪得粟二萬斛以輔給之不日而功集餘粟尚數千斛又為奏留以資後來河役軍守圭田比他郡

特厚公謂土少租重取之無名所得幾七百斛悉輸之官庾或謂太廉近名曰吾  
以免過耳以治最遜知潤州西津巡檢卒因襲鹽寇匿商人財其主將欲構訟羣  
卒反側不自安公知使謂曰事有失誤能償其財足矣衆意乃定遷太常少卿光  
祿卿連知漳台二州漳潮之間素多寇暴公為嚴警候募勇敢士與巡捕吏約期  
必禽之屬尉有連貴要之戚者而失期會立案以法賊黨望風破散天台歲苦水  
災每洪發則漂蕩民舍雖有捍水臺城斗門而緩急不能禦公至則相其地勢曰  
此高下不相直耳命工鑿山石增培臺基浚導溝澮民皆便之後郡守吳可幾貽  
書於公曰台人二年無水憂前政之惠也觀此可以見治效矣臨海尉舒亶自逐  
羣盜手刃拒捍者監司以為專殺欲寘之辟公力為直之至移鞠他郡亦不能奪  
其推心平恕又可知也然性介近狷又過謹畏與人接其意本勤然有終日相對  
或不交一言及遇同好則至誠恂悞談論疊疊通夕不厭故不知者謂其有城府  
往往待之如仇敵卒用此坐獲謗構時轉運使一日得飛語謂台不治倉猝按部至  
郡留半月求其所以不治狀無毫毛私匠才得本岸修籠官船及公帑市外縣海  
物二事劾奏之大理當杖九十公坐遂以本官致仕公平生喜讀書博寫對讎無  
有虛歲所蓄幾萬卷常以自隨雖遠官閩廣崎嶇山陸間亦未嘗置之初罷歸里

中氣力尚健而生事素薄或勸其營產旁郡可圖豐厚者曰邱墓在此將安之乎所居惟故屋十數間陳文史於前日以游目其家之有無一切不問疾革猶不捨卷可謂好學也已所為文章溫粹辨博尤長於詩什舉進士詩賦御題南風之薰其警句曰氣生唐殿爽聲泛舜絃來初在優等為覆考誤降抑之猶不失上第後預編入仁宗羣玉集中尚方字扇亦有題此句者嘗進治安策二十五篇續策數十篇忠言十卷請塞詔舉不報其精心致思益亦勤矣終不以時不見用而廢翰墨此可見其所存也雅好評論時文每得一篇一詠摘其佳句成誦於口兩為南宮點檢試官凡經賞識者數十公後皆大顯於時其為郡亦崇尚儒雅之士在丹陽尊禮章望之江陰劉洎新定倪天隱或親聽其講解或表薦其履行學者以此翕然稱譽之公享年七十以熙寧四年某月還政以五年三月甲子捐館舍以六年八月甲子葬於郡西建昌山之某原與繼夫人某縣君胡氏同塋夫人同郡人賢明有清操前五年卒公以失內助躬為治喪既得此地即於其旁自營壽藏比襄事其孤奉遵治命皆如素馬二子長曰平恕常州團練推官監欽州鹽酒稅次曰某尚幼也七女六皆適人一未嫁而卒前進士胡英才河南府尹戶曹叅軍鄭介卿秘書丞提舉江東常平倉何琬淮南節度推官知泰興縣程筠乾德令鮑祗

陳留主簿周彥崇皆其塔也初公母王夫人早亡而集賢君以恩敘封止及繼室盧夫人痛不逮適偶時公尚幼解曰異時子有登朝者則違命自及矣洎為列卿王盧夫人皆進封郡太君在仕媵其宗族疎近均遍其貧不能葬為之助舉者凡二十一喪女兄先適蘇州司法叅軍馮彭年既寡并其四子取歸以鞠育之至於成立又移俸錢給甥姪輩比退閒俸益薄矣猶不取其移券考終之日家無羨財其子竭力稱有無以時遷厝由是南人士大夫益歎其清而有子以成志也時予方守東陽頗聞此言悲夫公之文雅篤學如此而為當時公卿大夫稱道又如此同時輩流負藝能者無不升用公獨以小疵齟齬終老不得志豈其命耶抑人力耶予至和中與今王府翊善馮廣淵同造正肅公公言疑似亂政不可不察古之傾家敗國者往往由之葛同年不幸遇此平生無以自明吁可畏哉予嘗以為吳公有為而言故記之詳也銘曰

公以儒學遭明世又以文詞策榮仕有知己以薦其才有名卿以藉其勢合是數者宜遂厥志卒用不偶云誰之致達人所以安命君子所以貴義昭其懿實刊此沈誌

殿中丞華君墓誌銘



華氏出齊平原唐季之亂一枝徙吳居常州之晉陵者諱勳為郡著姓不干仕進  
槃樂於家生宏以季子太常博士叅登朝贈大理評事生昂累贈尚書駕部員外  
郎君駕部之長子諱直溫字宣卿稚齒有立不類常童惟秉筆讀書之外一無他  
好嘗慕論相如之為人故志在功名既冠拔州進士薦已為鄉里稱美天聖末我  
先君軍無錫君與其從弟直清同以文章為贊先君一見大加賞異留君門下使  
予從其游因得接硯席習文史君性至勤刻所閱書傳皆手自抄撮日以三千言  
為準雖甚寒暑或課試燕私則繼之以夜未嘗廢其程予時羈州趨進士科舉為  
君牽勉蚤暮不得息日至抄誦數書作詞賦歌詩雜文如是者幾二年因得通經  
術知古今緊率厲切磨之效也康定元年朝廷以西師連歲不解詔致天下能言  
之士問所以攻取方略翰林葉公樞副孫公上君所著舉茂才策論其言兵有決  
勝之畫召試學士院補試秘書省校書郎充寧州軍事推官以駕部君年高不赴  
既而遷保平軍節度推官鄭文肅公范文正公陳文惠公再舉君賢良試秘閣報  
罷復調廣濟軍判官徙池州軍事推官滿歲考課用今定州韓丞相洎部使者五  
薦章當遷秩以親疾不俟引對而歸遂求還政改太子洗馬致仕君平昔志尚超  
邁學緼既厚思欲有所據發嘗謂儒者事業以致君澤民為先務非乘時藉勢不

可行已之志故始時銳於進取三仕幕府雖不適其所懷然連佐貴近名臣亦欲因之有所施設故不屑小官亦不為權要而移其守以是諸公多稱其有風力前後薦者三十餘人而卒不得遷初國子監薦直講而講官方限年五十以君少不如格嘉祐中朝廷選該洽之士編校館閣書籍時韓忠獻公執政欲用公以君休老而罷是可以謂之命耶今上即位泛恩遷殿中丞賜五品服元豐元年八月十六日以疾卒於家享年七十三始君求致政時年且四十九自謂士非無時而知我者不為不多然動輒齟齬欲強不可故勇於退休既還家杜門不復接世務以文酒自樂間命子弟講說義理欣然如有所得交親相過從則酣飲笑歌極歡醉而後止如是者餘二十年如一日也去年予自錢塘還京師道毗陵過君留連道舊故悉出諸子為拜意勤勤且言少年相從時慷慨論時事一何壯耶豈意離濶四紀而才一交臂人生出處不可期如此今僕優游鄉閭而無所求一見故人足以慰平生矣今又以七言詩見懷予方屬和未達而君逝矣嗚呼可悲也君娶同郡李氏早卒追封南宮縣君又娶丹陽周氏司勳員外郎陵之女生三子逢邁皆舉進士遇尚幼三女並歸進士君所著文章三十編凡三千餘首風格渾厚論議純正引據深切大抵宗範韓柳而歌詩尤多手錄舊抄今存者猶百餘袂其用意

專篤又可知也逢邁卜以其年十二月庚申葬君晉陵縣萬安西鄉油澆墩之南  
原先期以書屬予曰知先人之深且久莫如公者不朽之托敢以請予感今懷昔  
不覺愴動遂為之銘銘曰

古之君子學以為己或出或處視其所履得時而行不能則止在義不虧視彼猶  
此宣卿克勤篤好斯文旁通浹洽論著淵純壯志超銳陵厲霓雲進而齟齬退亦  
逡巡年甫知命遂還官政安頤里閭沈酣觴詠其生既全其終乃令刻銘陰堂以  
鴻後慶

蘇魏公文集卷五十八

宋太子太保右僕射同中書門下平章事司空魏國公蘇頌撰

逢年

裔孫萬靈重刻

墓誌

耀庭

職方郎中辛公墓誌銘

某之外舅尚書駕部員外郎辛公以公族子兄弟孝友行義見推鄉論二季不幸  
早夭三昆仕宦皆為郎官歷典州郡以政事聞公於其次叔也又能力學取科第  
益為士大夫稱道以為辛氏昆仲可謂能世其家者也初駕部之葬某既銘其墓  
矣今公喪卜遷有日諸孤復請誌因論次以續前刻云公故叅知政事追封晉國  
公仲甫之孫太府少卿分司西京若冲之子諱有終字成之少舉進士試禮部不  
捷姊夫翰林承旨中山劉公筠留寘門下將推任子恩薦之公力辭與其季有章  
由是人益奇其遠操中山公一代文宗門人賓客皆當時豪雋之士居其間相與  
講學切劘浸漬遂至於大成以之策名則從容如取已物以之從政則寬裕而為  
吏表信夫資之深而蓄之厚也公以景祐元年擢第補汝州團練推官知潁州沈

邱縣事政以平易為尚故民便安之始一年民恐其滿去也於是父老數百輩詣轉運使請留再任會公以父憂去職不報服除再調寧國軍節度掌書記歷事太守二吳公所為不同有如水火諸僚或傳會其意以求合獨公贊佐有體不為前後易守故二公待之如一方是時朝廷督責諸部使者加轉運使以按察之名又增判官以重其任而江東三使者楊紘王鼎王綽也號最辦職文移舉植無有虛月公被臺委鞫滯訟案積欺一歲間幾百餘事連逮者甚衆公皆推折枉直或原或坐盡中情法三使者嘉之交薦於朝代還考課改著作佐郎知河南府永寧縣移知益州新都縣縣衢舊無阡陌公為溝遂課民植槐柳雜果於兩旁未幾木陰茂密邑居便之先是晉公以補闕守彭州嘗種柳城中以蔭街衢及去郡人思而愛之號補闕柳新都之民猶知其事謂公有祖門之惠愛焉累轉秘書丞太常博士通判原州知青州博興縣由尚書員外郎六遷至職方郎中嘉祐四年知鄂州其年初通茶禁令民戶出租錢鄂之邑歲當七萬三千緡使者累請得減三萬緡仍自次年始除之公言民病榷法之弊復苦橫斂上幸弛而寬之矣然歲中災歉猶甚望并蠲減以紓編戶之艱急詔可之而隣境得以例蠲者二州榷禁既除三司悉收諸路茶本茶租錢歲計上供公以為本錢出縣官今官不市茶上供故以

租錢賦於民若盡輸京師則南方貨幣竭矣有司詳定如公言而漕臺蒙利尤博舊制鄉縣衙前止三等而州郡差使有五等其患常在力役不相當吏得高下任情公為奏定皆作五等以物產多寡傳差役重輕自是役者稱平諸邑坊場舊有無名酒額及上供綱還摺運載鹽赴本路二者為州人患且久公皆例上其事得請罷之迄今人懷其惠治平二年知渝州州界濱帶獠夷種人喜乘間內侵捕吏平居未嘗撤警或科名齋糧餽守卒公至則悉召巡檢縣尉還本解使番漢不得相擾但遠斥候緝器備嚴訓練而已獠人知之終公之政無復犯境者本道上凡最以公治第一明年八月一日以疾終於州寢享年六十八公之先世著籍汾陽自晉公以大臣謝事留京師及薨葬許州之長社而子孫遂占數死者以昭穆從大墓將葬尚書卜祔大墓不吉卜陽翟之三封原吉因定禰塋諸子之先亡也皆以次奠公今又祔之以熙寧元年八月甲子厝事從日月之吉也夫人王氏國子博士羽之女逮事姑章名有禮則繼夫人馬氏太尉忠肅公亮之季女出貴冑配君子睦中外之族無不得其歡心者封永安縣君先公二年卒並合窆本壙子男三人長男煜太廟齋郎次日次晃皆謹飭幹裕保守門法女嫁太子中舍張復圭司門員外郎王瑜含山縣令馬玗太廟齋郎張孝敏餘皆早亡初尚書之歸休也

公就養左右未嘗遠去晝則視饔膳夜須定寢然後反室篝火親學或達旦不寐如是者幾十年暨尚書亡公與仲氏崎嶇田圃間力幹窳窳無不如禮者居家事諸兄如父閨門雍雍無間言人以為愛恭之至得於天資非外獎所及也某於姻黨中接公最熟每聽其言論沈密婉約皆有味趣大抵本於人情而歸之恕已所為如其言嗚呼可謂豈弟君子也已銘曰

辛公樂易為世良吏不縱不苛歸之中和四邑善治二州長利惠愛人謠風猷世濟廉章薦論課以最聞未膺褒表奄謝休辰神復渝江喪還願瀆安茲曠途從禩之卜

朝散大夫累贈戶部侍郎趙公墓誌銘

公諱溫瑜字子美御史中丞兼宗正卿贈太師中書令兼尚書令魏文定公諱安仁之長子魏公在真宗世以道德文章為一代名臣歷翰林學士叅知政事生七子皆傳其家學兄弟以修謹相尚不肯碌碌為衆人所為故其仕宦多至顯官出使典州皆有能稱當時士大夫之論以其家法如此而公之諸弟則曰所以能保守其祿仕不墜素業者實吾兄誨飭使然耳公為人渾厚篤實不喜矯飭以微名譽平居視之和易若無所不可者及其遇事臨文法則持守堅固人鮮能奪治家

嚴而有恩接人恭而盡誠當官勤而愛物蓋有先世之風範焉公景德某年以執政子起家為太常寺奉禮郎嘉祐二年五月以少府監終於家在仕通五十年其間十五遷秩歷京寺監丞國子博士尚書員外郎中司農光祿少卿最其任以事者由兼宗正主簿出知河南城父蘄水三縣由蘄水陞通判石舒二州由舒州陞知洋蘄隨解晉五州由晉州以朝選知發曹濮三州而曹不至官由濮州以疾還京師權判殿中監凡更十四職大抵治簡而嚴不務苛擾以此人信而愛之先時蘄水有疑獄前令久不能決公至一訊而伏吏駭其明而不敢犯其後領州州人猶望風懾戢蘄俗右鬼有病用巫不用醫公為教諸巫使習診病又擇經方揭石於衢肆由是人知用藥稍革舊俗赴梁洋日道岐下聞蜀寇乘饑聚黨揚言將略洋州或謂公曰賊勢方張城中素無備不宜遽前公曰吾既受命為守臣聞難當亟往若遲留觀望豈朝廷所以任使之意耶即日單騎遂行遂者過於路不知公太守也比至州吏民驚且喜曰強守來寇不足慮也因為之畫方略修禦備軍聲益振賊聞之遁去轉運使建言國初以來關隴之民多徙蜀者歲久人益衆盡地力不足以給其衣食誠令僑寄之人悉遣還本土則蜀之財力可紓什三四事下諸郡公獨奏曰向時東人所以西徙者蓋因五代之荒擾耳比天下無事則已習



其土俗或長子孫一旦遣之是重困擾非所以固其心也朝廷是之於是洋民德公之深至有畫其像日拜於家者其在解州論安邑兩池利害者為一書目曰解池樞要上之又言官車輦鹽輸數十郡役卒推挽晝夜不得休息疲者既不勝其敝因而竄逃累五犯則抵死役苦法重犯者相屬幸朝廷矜寬之詔聽其減死論三路民兵有老與病例得以強壯子弟黥面代名是時河東經略使料已代黥者徙隸旁州下軍而晉卒當徙者幾千人兇兇不自安公謂之曰邊兵額無高下廩給均厚何憚而不往若撓帥府令動搖軍旅則有罪矣衆遂帖然就徙本路初更鐵錢法以大錢三當一公以為貨幣驟亡十之七貧者必先受其弊矣因密召諸軍校令軍中有質貸者約以三日盡贖歸毋得蓄錢於家日滿然後頒行其詔又誘諸豪發粟儲困窘以平物價艱窘者獲濟矣東陽災歉流民入其境者日不減千計公躬為撫視聞官舍以居之便宜發常平倉并募富人輸粟以助賑給至歲稔而止所全活者益數十萬人於是某從祖節判府君適在幕下預幹其事後屢稱公救卹之術條教最悉佗郡莫能及也而轉運使亦言於朝廷賜璽書以褒之觀其治狀則其才資可知矣公平生好讀書至老不倦尤喜星厯五行之學晚悟性命之理浮屠所謂禪宗者頗得歸趣故於榮利泊如也初領東陽頗難於遠行

及渡錢塘江乘潮盪舟中流而嘆曰王陽不欲乘險蓋類是矣自爾意彌不釋踰年感風眩後五年至濮上而疾復作既還都累屬所親為剡奏求納祿章未及上而疾革其亡也朝廷以三品賻布給其家諸弟多在朝衣冠弔者盈門咸曰喪一善人矣享年六十一階朝散大夫勳上柱國開國天水縣子食邑六百戶服紫衣金魚始娶焦氏某官某之女未及封而卒再娶李氏某官某之女封隴西郡君後公七年卒生五男九女男皆世其官約之殿中丞順之早天隆之稷山令君弼以大理評事卒君紀太常寺大祝約之方雅有吏幹稱薦者多名公表率諸弟復得其家法以登朝恩累贈公為尚書戶部侍郎追封焦氏夫人為崇德縣太君李夫人為贊皇郡太君女皆從士人其壻曰祥符尉張邁進士黃孝儀黃必大理評事林鈞絳州判官呂定著作佐郎蘇結蘇州司戶沈邁許田尉沈遠華陰主簿王黯而著作君實某之從叔父也公世為河南洛陽人曾祖贈太尉諱處厚祖殿中侍御史贈太師中書令諱孚洎魏公皆葬洛陽公歿之九年議葬卜地得伊闕縣教忠鄉之某原吉於是舉公及孀夫人之喪並厝其壙時治平三年正月某日也葬前三月公之亞弟賓客君次其功狀求文於嘗所親厚者銘之予與公相接雖晚而世連姻媾通家有年固已詳其履歷矣遂銘不讓銘曰

盛矣趙宗其源蓋遠數世力儒始晦未顯御史既仕立朝蹇蹇至於魏公遠大繁  
行魏公七子公長而賢表率其倫孝友是先門內雍雍行義不愆施於有政仁聲  
在焉公治七州皆有能績民詠遺愛朝嘉敏力音猷雖謝風聲未息紀其芬芳刊  
此幽石

潁州萬壽縣張君墓誌銘

斯立名挺卿太常博士集賢校理宗古之子尚書工部郎中直集賢院象中之孫  
父祖繼以文章登儒館顯名於世斯立與其兄都官員外郎晉卿傳其家學俱用  
是擢進士第而斯立又用是舉賢良方正復大振名稱於天下既而被召至京師  
試有日矣一夕無疾而卒於景德之僧舍於是士大夫識與不識皆惜其才而嘆  
其未得大施於時為可痛也斯立天性敦樸而強敏過人幼自刻厲不喜他習惟  
讀書著文則不知倦厭甚則至於忘寢食忘寒暑衣敝膚垢而不以為陋心勤形疲  
而不以為苦其語默舉止動有準則未嘗妄發蓋得之於中也深故形之於外也  
裕殆非勉力之可至者人從之游久而益親與物無競而衆譽自歸少與河東裴  
煜如晦常山宋敏修中道友善情好莫逆雖出處異勢而趣舍一貫時則講論疑  
義簡牘切廬往返數四必理盡而後已斯立初舉進士時名聲未有聞也二人者

為誦其試篇於同寮以為自慰場屋未見如此之文也自是當塗稍稍有稱道斯  
立者斯立以嘉祐四年三月擢第補遂州司理參軍上官薦其才徙潁州萬壽縣  
令遂舉詔科以治平二年六月三十日卒以熙寧二年十月二十八日葬其葬也  
妻弱子幼不能舉事惟是轡櫛窳窳之具皆二弟彥卿升卿主之乃克如禮於此  
可以見其友愛之義素著也張氏先世本澶淵人東上閤門使昭允軍器庫副使  
昭易兄弟並事太宗皇帝於晉邸尤見親用即位踰年而擢為內使不幸俱早世  
軍器家留京師遂莽開封其後二集賢君皆祔之凡三世矣而閤門之子孫別葬  
揚州斯立卒之明年都官洎季弟推卿及母夫人錢氏相繼殂喪卜葬開封不吉  
卜改遷其先府君并葬揚州吉於是彥卿同日舉五觀浮汴淮而南下定窆江都  
縣之某里府君夫人合祔餘皆昭穆相從所謂以禮葬者也斯立文章雅麗閤瞻  
規撫出於柳柳州劉賓客杜紫微楊文公宋宣獻使之一用於朝廷評者必曰典  
冊之文也論議該洽純正似賈太傅董膠西陸宣公使之冊於天子之前主司必  
曰王佐之才也嗟乎年止於四十二而官不過百里宰卒不得如其志此所謂命  
也夫始娶晁氏又娶蘇氏蘇氏予長妹也二男子長曰康直用其舅端明殿學士  
錢公奏補為郊社齋郎幼曰康叔斯立所著文章遺藁詩賦箋奏議論策頌凡數

千篇皆其手札細書未有倫次如晦常欲取而敘之為集未就而如晦又卒異日  
二子當有能述厥考之美而成先友之志者則其傳也益遠矣銘曰

斯立之文淵源典墳辨言析理祖義基仁斯立之行規矩顏孟樂善志貧安躬俟  
命資適逢辰道思致君大對有日半途邁屯愴彼明時喪茲國器誅行旌賢琢銘  
泉隧

儀鸞使銀青光祿大夫任君墓誌銘

任姓出帝者後傳始為黃帝二十五子以德為姓者十四人任其一也由漢以來  
其別為七皆廣阿侯敖之裔也而安樂之望為盛至我朝仕而顯者蓋三家一在  
濟陰一在洛陽一在汶陽而濟陰之族又其盛曰禮部尚書康懿諱中正以樞密  
副使叅知政事事真宗仁宗曰太子少師致仕英國安惠公諱中師復以樞密副  
使事仁宗兄弟先後登二府為時偉人故其子孫承家皆襲榮路儀鸞君即安惠  
公之嗣子也諱拱之字公肅生五歲用康懿公任子為右侍禁累轉內殿承制以  
安惠公引年洎遺奏連改供備庫西京左藏庫二副使四遷至儀鸞使知忻州治  
平元年四月甲子以疾終於州寢享年四十七君為人倜儻有志介而性特孝謹  
自以寡兄弟由少及長奉養親側未嘗遠去其從宦不擇閒劇必以便庭闈為請

安惠公之還政歸南曹也丙君本州兵馬都監及公薨內使例遭喪滿百日墨纒起就舊職君以為獨任先人後事不可捨帷堂而從組綬堅求終三年制惟是哀麻窆窆之事無不以時者當時士大夫稱其知禮外除管勾御葦院用京畿提點薦為雍邱縣都監未幾擢提點京東路刑獄公事移荆湖北路滿秩知全州所莅以善治聞歸朝嘗被詔引伴西夏朝正旦使人君姿狀偉特進止嫻雅尤為西人憚伏其土毛之摯比舊特豐厚君視其不循式者皆却之人或謂之曰此常例不足拒也君曰吾聞之先人仕宦俸賜外所得無名皆不可受平居時交親相遺尚懼有涉嫌者况敢貪異國之賂以敗家檢乎後又持仁宗遺詔賜諱祚至其界牛心亭候人具食欲坐君東向君曰天子之使適下國自有常禮豈容輒有更變耶卒據主榻夏人不能奪及行諒祚遣其逐使持馬駝為禮又益以金帶繒帛之品且曰曩時使人至闕常賚之外有酒果燈籠之賜今國主尊王人故好幣加等所以將勤至之誠幸毋辭也君曰朝廷賜予非藩國可以為比卒取馬駝而去使歸深被嘉獎遂拜忻州兼兵馬鈐轄治尚寬簡軍政不肅而威邊民戴其德惠監司亦屢薦其能今叅知政事趙公吳公翰林錢呂諸公皆相引重期以遠躡而命不副時奄忽摧謝此知識者所以嘆惋而重惜也君三要皆甲族令人曰太原王氏故相

沂公之姪女曰福昌縣君李氏尚書右丞昭述之女並先亡曰文安縣君王氏六宅使合州刺史淵之女四男曰大理評事承元卿曰大理評事元偓曰太廟齋郎某曰某官某二女長適大理評事梁彥深次幼未有行君好學通書史善筆札嘗采前世忠臣孝女事之尤著者書於屏障以為家戒故諸子輩承事惟謹語家法者多之君嘗言吾世為儒者獨從武弁懼忝先代方將請於朝丐換閨臺散秩而志尚未果及屬纊之日命僚掾草遺奏敘其意求一子為文資朝廷從之諸孤自定襄行哭護君之柩還曹南十四年某月某甲子窆於某鄉某原從先塋之側邀文於予以誌其墓石予惟慶厯初先君嘗副安惠公使北都方是時朝廷推恩使者子予得與君同制被命後予使府畿元卿適官屬邑每見其幹裕敏恪竊私謂其家法如此此不可無述也銘曰

惟任遐胄曹今為右康懿登樞英公拜後位以望隆慶由德茂子孫其承不墜厥構有美儀鸞繼仕朝端孝不遺親勤無廢官業行典郡克濟以寬往返敵戎不憚其難朝有知己薦之器使胡年不羸俾至斯隆彼銘者旌來朔之裔反宅故邱有子之似

朝奉郎太常博士張君墓誌銘

毗陵張君諱奕字源明以慶曆六年舉進士擢乙科解褐試秘書省校書郎連調  
太平台州軍事二推官權洪州觀察推官用薦者章引對於延和殿改著作佐郎  
又用三司使蔡公奏為三部推勘公事今天子即位推恩遷秘書丞考課進太常  
博士以治平三年五月某日卒於京師之僦舍其孤中行請舟載喪南歸即用某  
年某月某日甲子葬於無錫縣某鄉某原從大墓也張氏世居無錫以善治生產  
名鄉里至今而超然自喜從諸生游學經史為詞章以取科第固已為士友所奇  
矣及其從官專力塵事課簿書持文法所居以善稱茲又人之難能者台州大水  
壞城郭居民奔避無地君與同僚日夜走塗潦間為鄉導使人去卑就燥又躬督  
役事雖極疲頓亦不少憊而堤防遂完城中脫墊溺之患者君之力居多洪之屬  
邑有盜縱火焚人廬舍者亡三年矣一旦獲賊即訊歛服問其火具曰始以瓦盜  
藏火至其家又以芻竹然而焚之問二物之所存則曰瘞於某所驗之信然既具  
獄君獨疑有寃因謂獄吏曰盜亡三年而所瘞之盜竹視之猶新此殆非實耳於  
是吏再窮治之果得枉狀而免之三司獄號最繁者日以數百萃庭下其間繫財  
賂之出入杖連蔓引枉直不可遽辨君皆推窮本原審覈情偽事小戾則曰所部  
辨析反覆或累日不已上官始偕謂君滯懦不任事既而察其情至而從其初議



非夫純明於中而不撓於外者詎能持守如是耶君居鄉里事繼母以孝謹聞友于兄弟門內雍睦人稱其家檢性尤樂善人有所長必推挹嘉嘆謂已不若家之小史張某者奉事謹畏君謂為可教因勉以學畫則親授經義暮則使為文辭如是者久之卒至於成就而遣去後十年亦登進士第今為金壇主簿君雖出富室而從宦於外惟倚祿為養有不足未嘗取於家故病且死其醫藥棺具猶有不備者由是士大夫多嘆其廉且介也始君之先世未有仕進者逮君登朝緣郊祀恩追贈其父諱瑩為大理評事追封其母陳氏為仙游縣太君其繼母湯氏為壽安縣太君其配朱氏為仁和縣君庇其族人追胥力役之事者不一夫人能自奮力學其効乃如此誠足以勸鄉閭為善者也君二子長即中行亦知向學次曰梁卿後君十五日而天三女一適邑人陳充一適進士李毅一幼在家君之葬也同年生嚴叔堪論次其履歷與行能邀銘於予予官計省接君彌年每相過從語公家外時論理道聽其言疊疊有緒未嘗及名利觀其所守誠宜書之於是作銘以刻其墓石云

猗張君行懿醇出民廬仕朝倫守道固服職勤從知已幹劇繁治衆獄無寃人志方展命已淪喪南歸曠江濱刊厥美載斯文

屯田郎中知博州梁君墓誌銘

熙寧四年正月某日甲子故丞相贈司空兼侍中梁公葵於鄆州平陰縣某鄉之某原以其第三子新博陵守尚書屯田郎中亞之君祔於某方之某穴前此君之仲兄發之以狀屬予曰大事有日矣先君之墓翰林承旨王公為之銘矣吾弟屬游有舊不朽之圖敢以為諉予惟早歲與君同僚南都相好甚歎嘗謂君文雅修潔資適逢世使之得位見於事業當有大過人者不幸早逝遂湮鬱弗著此僚友之所共嘆惋也然則紀述之義所以發沈晦而章懿實其得無辭乎君諱彥回亞之其字也機性夙就讀書學文勤刻不廢早夜及其發也沛然不可禦類非積力可致者昆弟皆少年得官京師而志尚益遠期於自奮慶曆五年秋舉進士同時預薦者三人而君復在魁選明年春遂與發之同年中第始君之大父翰林公洎世父史館公策進士於太宗真宗之朝俱為天下第一丞相又擢第於仁宗世卒以大用至君昆弟聯踵取世科名聲暴揚天下於時論士大夫世俗之美而文譽之顯者以梁氏為盛焉君既仕官又以吏能稱平生厯官者九階領事任者六政而所莅必有聲稱人皆謂之才有餘而志未充也初以將作主簿知京兆府萬年縣未行從丞相管勾秦鳳經略使機宜文字次以大理評事應故龍圖閣學士孫

公祖德亳州南京兩府辟命簽書判官公事次以殿中丞通判瀛州次以太常博士從河北轉運使薦舉通判雄州又用權場歲課盈羨特遷屯田員外郎次以都官知懷州英宗皇帝纂極推恩改職方遂正郎列權判本曹出知博州未赴任以治平三年五月九日卒於京師城西之私第享年四十一君為治尚寬簡而傅之以文法事至乃應不肯預為條教以此雖處叢劇亦無苛滯故所至吏謹於法而民安其守監司交章稱薦以為可大任雄州舊苦公厨之弊歲時使客旁午而飲食之饋靡有虛日常擇牙校之厚貲者主之雖殫家力不足以支浮冗君至則為之鐫治宿蠹易軍校代主者委積有素出納有定侵牟吏無所用事其間前弊遂革又言於朝廷應邊郡有若此類請一切更之北道於今稱便嘉祐末大賚天下三司調絀絹河北諸郡一用省估市易緡錢以給諸軍省估既高不能即售往往配抑編戶遠近苦之君遽上其事以為新天子即位海寓咸蒙利澤豈根本之地而先有勞擾幸明詔許平其直使民易以轉移其後得依所在實價蠲減者自懷始也開封府劾雍邱縣刦盜四人獄具移紕察君被臺檄審問閱視案牘疑辭有傅致未盡實狀留之累日摘其罅漏以示吏及就訊果二人嘗自言當案問未減法府未即斷會有曲赦四人者皆貸殊死繫君叅審詳慎之致也在獄令為雪活

二人而君終不自言或問所以答曰初非不欲言念一言之蒙賞甚輕而有司坐深故之罰重矣夫以重罰易輕賞豈我所為哉人以長者許之君喜為文詞長於諷寓然不高華藻取意暢而已嘗獻治亭太廟治平初郊二賦並蒙優詔獎答儒者榮之河朔連歲有大水地震之異君推本六沴以為咎在陰教失序力役勞人讒夫未去正人未用官司縱弛法令苟簡因條為六事上之又奏丹宸十箴其言主於規切見之者謂君端方亮直有爭臣風采使之立於朝廷之上必將推已道以及物不然出奇納忠自下劇上二者必有遇焉惜乎邁時方亨齋志而歿古人以道之不行為有命者豈是類也耶君娶滎陽宋氏故司農少卿孝孫之女吏部尚書白之曾孫封仁和縣君生二男子曰子諒子雅皆為太常太祝六女子長適光祿寺丞呂延問次適太廟齋郎王凝四尚幼君孝友愿恪加之以兢畏不怠故能遠於悔尤始卒無玷亦其家範如此子孫承教皆端飭自持可以保其世祿矣初君之守懷也丞相方鎮河橋封壤相距才百里而近父子惠愛被於河濱歌詠之聲相聞道路語仕宦者以為美談云銘曰

亞之嶷嶷載世襲美翰林之孫丞相之子躬服名教心潛墳史發藻休辰差肩多士初佐藩僚事立名昭累勞積課少明在朝進登郎列出典州條忠言疏抗善政

蘇魏公文集  
卷之八  
民謠時亨運短道未大顯後有達者宜章厥善堂在高原銘在幽泉聲光不泯世  
世其傳

蘇魏公文集卷五十九

宋太子太保右僕射同中書門下平章事司空魏國公蘇頌撰

逢年

裔孫萬靈重栞

墓誌

耀庭

中書舍人孔公墓誌銘

中書舍人新淦孔公諱文仲字經父其先出魯曲阜苗裔宣聖之後襲王公封者  
逮今四十八世皆居曲阜其支屬散處四方多有聞於時者而公之六世祖曰績  
仕唐為吉州衙推卒官不復北歸因家新淦新淦今并為軍號臨江其子孫遂為  
臨江軍新淦人衙推之曾孫處士君諱文質公之曾祖也皇贈光祿少卿諱中正  
公之祖也尚書兵部郎中贈正議大夫諱延之公之父也公世儒者少稟義訓知  
自刻苦經史傳注百氏子集外至於天文律歷算數之書無不識於心而誦於口  
其議論浹洽講解精辨諸宿儒老生往往不能出其右嘉祐六年隨鄉貢至禮部  
奏名為天下第一廷試擢進士丙科初正議公出白屋起江表登慶曆二年乙第  
至是公又以文名振場屋二季武仲平仲相繼舉太學試南宮皆取甲等故當時

語文學高第者以公家為甲族馬一命試秘書省校書郎杭州餘杭尉再調南康軍司理參軍以正議使湖北請解官侍養滿歲用薦舉升台州軍事推官熙寧三年詔舉賢良方正之士龍圖閣學士元公絳天章閣侍制吳公中復以公應詔召試秘閣論在第一對制策入三等上是時朝廷方大有為輔臣建議以謂祖宗法度至此已敝當悉更改用事之人爭言理財訓兵以合其說而言事者不以為便繼被譴斥而公之策亦不以為便故執政疑相與表裏奏黜不收趣還本任既歸值監司旁午商度利事皆公策言不便者相持甚久未幾公丁內艱去職遂止服除除充國子監直講時學者方用王荆公經義進取以公不習是學換三班院主簿武選日受牒訴不下數百求官者至有相詬競於庭主判悉以諉公公為剖析曲直得與不得一語而決人人莫不釋然改著作佐郎通判保德軍軍城依山居人常苦井飲不足時有泉出城東山腹挈瓶者又難於出郭公奏展城圍其泉郭內城人以為非止便於用汲亦可以為守禦之備也官制行由宣德郎遷奉議郎還朝法當得便官屬火山軍闕通判格用進士有不悅公者因以命之二壘相距才數舍俱號窮僻公適自彼至未旬月復被遣亦不辭而往至則修舉廢墜督責吏胥案邊瑣輯民務武守賴以成績元豐八年夏覃恩轉承議郎今上初纂嗣太皇

太后同聽政相司馬文正公稍復故事擢用舊人以毗初政元祐元年召公為秘書省校書郎近臣薦諫官者八人以儀曹方講廟朝之制擢公為禮部員外郎神宗廟配享功臣衆意多在王荆公公曰精忠貫天地功利及社稷贈太師鄭國公富弼乃其人也衆不能奪卒用鄭公配享有言皇族稱謂惟楊王荆王得曰皇叔餘疎屬當各係其祖若唐人稱諸王孫比公曰主上新即位宜廣敦睦之義不當疎間骨肉前議遂寢二年自朝奉郎起居舍人拜左諫議大夫公素懷致君及物之志既在言責益思自效每朝廷政令之出無不深求其得失之迹以告於上前後陳數十事或用或不用義之所在亦不為時之譽誅而回未幾遷中書舍人偶寒疾未拜命猶謂所言未盡悵悵不已一夕草奏三千餘言首論前代英哲之君容受直諫其始勤終怠或致危亂願陛下鑒此聽納讜言常若元祐之初則天下幸甚明年春同知貢舉嘗謂士之扶藝以干進升黜當否繫有司之勤惰於是盡則據案以稽參程衡夜則篝燈以點定朱墨前日之病猶未聞而治事不廢同僚覺其勤瘵因語以法有疾許先出不爾且就枕毋宜自苦如此公曰居其官則任其責豈敢以疾自便其勤如此卒至於大病及事畢奏勝歸第未旬朔是年三月二十一日以不起聞嗚呼竭力奉公以躬徇職如是者幾何人哉古所謂以死勤



事者其行雖異而其徇一也兩宮覽奏惻然下詔厚卹其家及喪歸又命其季弟集賢校理平仲為江南東路轉運判官俾得以撫孤弱而視窳窳也士大夫識與不識聞之皆失聲嗟悼以為朝廷喪一直臣而翰林蘇公子瞻往撫其柩曰世方嘉軟熟而惡崢嶸相師成俗求勁直如吾經父者今無有也予與正議公同年進士從游有素熟昆仲之才美久矣熙寧初予方謫官居京師杜門不接外事一日龍圖宋公次道惠然見訪曰被命初考制料得孔君策九千餘言當世利病盡於此矣雖仲舒之博劉蕡之直無以過也然時議以為書等過優國朝故事無有此比考官行得罪矣予駭曰方朝廷求賢如飢渴有人如此而不見錄豈其論太高而難合耶抑言太激而取怨耶然聖明在上斯人豈終抑不用者乎它日聞吳丞相欲置之臺閣才得學官而人已忌之連蹇十餘年今上遂擢用之士論以為聖賢相值乃志士可行之時天下亦翹足以待其設施然而未聞再歲而天不畀壽使不得竟其素志惟見於言者可以紀述以示後觀則知其所存也元豐四年王師問罪夏臺兵夫數十萬皆出保德境上軍須百用通判專任其責雖趣辦應猝措置無乏然兵久不解邊人厭苦公上疏論其不便有三曰大兵未出而人夫預集一也河東雇夫勞民而損費二也諸路出兵首尾不相應三也蓋虞夏商周未嘗

無外患而懷柔制禦之要不在彼而在比去歲議役法者有以雇為是而差為非公曰諸言此者敗法亂俗之本不可不察也議科舉者或以經義詩賦策論為四場或以經義詩賦為兩科公曰四場是也又謂內降除官出唐之衰政聖朝不宜有此後因日食七月朔旦上封陳五事曰邪說亂正道小人乘君子外患陵中國斜封奪公論人臣輕國命察此所以消厭災異也凡所言多切直拂時人為危懼而上常察其誠意多為容納又言朝廷起處士侍經筵所以崇進道義也而希附者眾致興黨論使人不安其分浸不可長又執政罷不以大故宜全進退之體以散官領州恩禮非稱王氏經義今格不用而其親黨有專守其說者不宜置之朝右以蔽惑後進熙寧用事之臣有主新法而擾民事者謫逐日淺未宜內徙有權鹽利而酷刑罰者請命案實以正其罪上皆施行如其言由是論之居位雖不久而其志得行固不為少於士望雖未厭而於公志亦無慊然也公為人恬介自守持重寡言笑尤不事請謁尉餘杭日轉運使召與議事事已馳歸不復趨府人問其故對曰於府無事也在朝非公事不見執政法許同謁亦不往與人交不為苟合久乃見其情至前年予奉秋官之命因上奏曰智識明敏操守專固臣不如孔某請以代臣公知亦不謝及公再遷近職薦令彭紫微汝礪暨黃左司廉自代呂丞相

稱之曰孔君能舉類矣二公相繼進擢公不以為德其接物以誠無外飾多此類也性喜飲酒飲益多而色益莊其中皞皞然若有所得平居未嘗問家之有無內外洒掃之際家人諮所以處畫後事惟答以無事此豈其信道篤而知命至者耶享年五十六死之日家無餘貯惟有書五千卷皆手自校輯者遺文若干篇某人集為五十卷公舉進士時故紫微呂夏卿為南省點校官得公卷曰詞賦瞻麓策論深博其文似荀卿子雲主司以為知言推此言而可以知其他述作之體制也夫人清江縣君蕭氏同郡處士洪之女一子曰元方用公遺恩補承務郎三女曰保姐曰館姐皆幼曰榮姐早亡初公熙寧中遭正議公憂未幾母夫人仁和縣君楊祖母仁壽縣君劉相繼素養值歲之不易並舉三大喪而祖塋無可葬者遂謀去新淦而宅九江卜德化縣某鄉某里之某穴吉躬冒山谷涉歷寒暑不數月而塚宅成未終喪而室堂具鄉人見其區處咸以為得禮之實及公之喪歸集賢君挈其孤相地之宜卜某山某穴又吉於是六年某月日時克襄大事去正議塋相望數里而近凡域兆堂舍亦如其制此又得孝子善繼之義也前期二季以德銘見屬又得建康張舉狀公履行甚詳姑摭其大槩及嘗所聞見者以為之銘銘曰遠矣孔氏四十八世曲阜舊封褒成是繼旁支屢遷或越或莫新淦之族源同流

異是生紫微鳳舉鴻儀父子昆弟出逢聖時高文大策陳當世之宜嘉謨謹議為天子所知元祐初載乾坤交泰公為諍臣朝夕納誨言無隱情病不辭憊耳目之寄方宣股肱之虧已逮公生貢章有墓潯陽先君之側又為公藏上思遺直厚恤其喪爰命介弟出使江鄉言瞻廬岫幽靈其構彝澤出其南岷漢流其右慮岸谷之或遷勒銘詩而示後是為有宋之名臣宣尼之遐胄

職方員外郎郭君墓誌銘

尚書職方員外郎知單州軍州事東平郭君以熙寧九年三月己未被疾不起於州寢享年五十有五諸孤奉喪還鄆藁菴興化僧舍以元豐七年四月癸酉克葬於平陰縣翔鸞鄉大留里從吉卜也先是先公侍讀既葬於縣之肥城里餘三十年而太夫人尚無恙一旦素諸孫之養將謀合祔而視冢者曰舊塋地洿下而土疏惡占宜改宅去塋之北十里而近得今新域於是合公夫人之柩厝大穴而郎中洎職方君婦孫昭穆以從祔習士禮與通葬範者皆曰宜稱遂掩壙焉君之先世自陽曲徙東土萊州萊陽縣令贈尚書祠部員外郎諱宣追封清河縣太君張氏曾祖考妣也解州解縣令累贈禮部尚書諱禹偁追封彭城郡太君徐氏廣陵郡太君王氏睢陽郡太君宋氏祖考妣也翰林侍讀學士給事中累贈吏部尚書

諱勸仁壽郡太君李氏考妣也君初名元賡字永叔後從進士更名源明字潛亮少自修飭舉措必踐規矩接人無墮容無僂言至講論義理則毅然不可抗奪秉筆為文章不待師友之益而自成風格既舉有司名籍場屋嘉祐二年春沈翰林邁祖集賢無擇主試別頭得君程文置高等又稱誦於朝不容口既而擢第遂為時聞人初用父任將作主簿三遷大理丞歷監曹充二州鹽稅在京華蜜庫龍圖閣直學士知永興軍曹穎叔辟掌機宜辭不赴知越州蕭山縣縣之宿豪有父子為姦利者悉捕而寘於法有育孤女過時不嫁而利并其財者論以禮律使傾貲以配良人太守刁約聞之曰郭蕭山厭民望矣嘗艤舟餘抗津亭聞客有後至欲泊者亟徙以避抗守嘆其不爭因榜亭為讓後避諱改曰禮歸朝監永豐倉累遷殿中丞太常博士治平二年用今丞相王卹公承學士詔薦御史為監察裏行於時呂誨范純仁等六御史諫官以議濮安懿王祔廟稱號不合相繼罷職君受命之日拜疏論列以謂誨等忠言叢論許國大義可從可旌無名斥去望追還舊職而罷臣新命詔許上還除書今上登極推恩由尚書屯田員外郎遷都官唐質肅公為中丞奉請復臺職既叅知政事又薦陞任遂擢知華州秦鳳副總管主回易吏過郡監稅錢盡以不即赴務解州州鞠回易如法又投閹人以引入城不得為

漏稅蠹陰以狀白提刑雷周輔移劾旁郡而周輔適至辨爭不勝奏以為詢嘗使  
者而郡官亦上其事至遣使即訊君卒不自直遂免所居監淮陽軍酒稅而周輔  
亦坐撓法罷任君不以左官芥蒂晨入暮出如常僚本道安撫監司交章言其辨  
職滿二歲移知汝州州卒有戍邊者厭苦其主帥苛暴羣訴於前辭涉犯上既罷  
更有密旨誅及黨輩公察非辜議為奏請會有德音原貸者甚衆歲餘遷濱州不  
行改單父未幾召權三司度支判官以親年懇朝廷嘉其誠孝聽仍舊任俄而改  
職方以卒君趣高高爽不以得喪嬰心力學稽古常欲見於行事故立朝在仕勇  
於敢為而無所避憚熙寧初轉對上封言五事一曰撫遠人謂解西師以弭邊患  
二曰惇禮範謂大臣年至請老以全名節三曰信命令謂任官出令執政審可然  
後奏行四曰正刑辟謂監司失職宜隨事輕重以行責降五曰澄吏源謂恩澤入  
仕路之猥衆宜有裁損又謂天變地震皆陰侵陽臣強兵挫邊裔內侮之應望責  
任宰相內修治道外戒兵備以消厭未萌大抵指切時事忠精無隱觀其言可以  
見其志矣平生與游多一時方勁之士瀛帥李師中誠之尤相厚善誠之貶官過  
單留連累月涕泣不忍別蓋趣舍同而久要固也素通術數深信定分疾且革取  
其書閱之歎歔反面不復有言嗒焉委順非篤於信道詎能臻此惜乎年與位皆

負其實使不得大施於時此士友所以歎惋也夫人李氏工部侍郎應機之孫大理評事咸寧之女前十六年卒子男五人曰茂倩河南府法曹叅軍次曰茂恂奉議郎提舉陝西買馬監牧司公事次曰茂澤承事郎次曰茂曾次曰茂雍未仕女五人二早亡次適奉議郎孫亞卿封文安縣君後君六年卒次適宣教郎蘇熹次在室孫十四人孫女九人初侍讀公之薨也君援學士褒卹例請於朝特詔贈禮部侍郎君亡之五年茂恂為秘書丞加贈都官郎中而茂恂未登朝時與其弟茂澤愴夫人之不逮養各以當選一官求換邑封仙源縣君它日又進封隴安縣太君積善貽慶子孫善守家法官學相繼可謂有後矣予與君世契且親義分尤著諸孤方圖不朽猥以見屬撫實敘事繼之以銘銘曰

郭氏系周胙土於武仲叔二號叔謂鼻祖平王之東絕而復封謂號為郭遂啟厥宗分支別派燕隗齊最東都况躬西京欽解杜陵潁州盛於歷代及分汾陽為唐上軍本朝甲族太原東平武惟右戚文則貳卿於顯二卿逢辰遠至實生二子為時良器伯也清方隱吏潛郎仲氏亮直名稱最良仲之立朝不飾不矯屢抗封章帝用褒表躬雖遠臣心不忘君再辭臺省薦陞長人兩守藩郡仁聲益振才高命屈卒亦難進曲阜崇岡在汶之陽祖孫同域龜筮襲祥其祥謂何百世之裕令名

不泯茲邱益固

國子博士陸君墓誌銘

國子博士山陰陸君諱珪字廉叔尚書吏部郎中直昭文館贈諫議大夫諱軫之子贈光祿卿諱昭之孫以熙寧九年五月癸酉卒於濠梁之官舍以明年九月丙辰葬於會稽縣之表孝鄉趙樂峰之南原日月有期矣諸孤以國子直講襲君原之狀求銘於所知者謂予昔嘗使淮南表君之治效為一道令宰之最又嘗主禮部貢舉奏君之仲子佃為第一然則不得為不知者也於是以文誌其壙云君始以父任為太廟齋郎景祐中補湖州武康尉其令老且閭邑事無細大皆屬之君君年始冠矣而處事如理議者謂宿其官不及也再調信州司法叅軍州將張鑄以慘急覈下無敢與抗者君數爭曲直於前終不為所奪用薦者遷杭州南新令謫其尉馬惟一貪贓繫於獄或謂曰法無縣令下佐官獄事以此獲譴可惜對曰苟畏吏議而屈於凶人我不能也滿秩改睦州錄事叅軍衢婺之訟有未決者皆願移於君曰雖得罪猶甘心也考課擢大理寺丞知明州奉化揚州天長二縣皆以嚴著稱辨析姦隱如已親見之揚州大姓湯氏二子分財兄訴其弟為異姓子不當有分法父母既亡則以籍為定而江都廣陵之籍先為其兄購毀之情幾奪



矣又下天長君盡索架閣遠歲業牘閱之得慶厯中州帖有其弟之名者上之州是時州倅呂君希道適治其事嘗謂予曰十年滯訟用是以決之非有健令安能辦此太守諱玉汝亦稱之為有君子之剛而邑人謂其政可繼包孝肅公益公嘗宰是邑有遺愛故也然公之為政自明至曠雖退食不去廳廡而邑事以治君之政以聰察為先過其庭者肅如也方畫則無留人而邑事亦治由此言之政無繁簡要之實惠在人則久而益見思也會葺縣解財用不足請於州不可調於民又不可於是使人有罪非重故者皆得贖金以助費不日而工告完後使者以為法不當爾故奏罷之左降監濠州酒稅至則濠人謹曰此天長陸君也州以事諉之者十七八君亦精力不憚煩苦後雖病癰瘡猶龜勉臨務間或移告則州人乘門請起轉運使楊君汲薦之曰古所謂盡瘁於國者陸某是也方茲時朝廷切於用才不以年次擢者前後相望而君之資適逢世又有知己者在朝人皆期其行且見用矣不幸奏始下而君已亡嗚呼命也乎享年五十五有文集二十卷君少時通敏有才氣好學尚義其僚壻孫威敏公尤器待之曰奇才也鎖廳舉進士賈魏公置其程文優等後不中第亦不再舉曰吾豈不得已者耶然性喜飲酒每飲滿恬然以之酬酢事變愈醉而愈明嘗以所生母喪歸越治焦塢先塋屬歲旱乏水

一日有泉出其地中取汲足用既已事而竭焉鄉人以為誠孝所感也夫人毘陵邊氏兵部調之女號德安縣君生四男子長曰佖尉氏縣丞次即佃也審官東院主簿次曰傅真定府學教授季曰倚舉進士君雖仕宦齟齬不如志而諸子皆少年競立與當時巨公游聲稱已顯矣吳越之間多云吏部有陰德君能教之忠也

銘曰

所謂良吏其政平易雖以刑成卒由寬濟匪德匪威孰克用乂我見其人陸君是矣九矣陸君政以敏聞風聲肅肅雖歿猶存越山故鄉水深土厚邱隴在焉聞望不朽

同安高孫萬靈錫經

逢年舜明

晉爵耀庭

允恭子敬全枝宇

蘇魏公文集卷六十

宋太子太保右僕射同中書門下平章事司空魏國公蘇頌撰

逢年舜晬

裔孫萬靈錫經重禁

墓誌

晉爵權庭

太中大夫陳公墓誌銘

太中大夫陳公諱繹字和叔其先大名人皇考諱見素以尚書屯田員外郎通判河南府卒官即葬緱氏縣萬安山子孫因家洛陽遂為洛陽人公年七歲能屬文機警有成人風屯田公尤器異之景祐中年十七從開封府進士至廷試誤用韻不收慶曆初再舉為別試第一早與賢士大夫游已名聞於時自此蓋大顯矣明年擢乙科調梁山軍判官改鎮東軍節度推官舉賢良方正試秘閣幾中選矣以書等異同報罷再調西京留守推官嘉祐三年召試學士院充館閣校勘編定秘閣書籍改著作佐郎秘書丞進集賢校理刊前漢書中誤謬以母喪去位詔聽即其家校讎終制還朝當是時英宗即位二年矣猶恭已謙默政事仰成輔相公以謂承平日久庶事寢弊乃人主大有為之時因密獻五箴欲以感動上意其一曰

主斷其大畧言主道雖不以事詔任賢故在勿貳然威福之柄當出獨斷則權綱攬於上矣其二曰明微言馭臣之要在知下之邪正邪正分則姦人無所容而賢者進矣其三曰廣度言養德兢畏則聖度未廣退託謙虛則事有所不治故定國家之大計者不必徇小節小謹也其四曰省變言天之譴告當應之以實人事修則天意得矣其五曰稽古言觀古所以治今願詔近侍博采故實度可施於今日做而行之亦南面簡易之道也遷太常博士賜緋衣銀魚同判尚書刑部每閱天下奏案有情法不相當皆請讞之或謂刑司惟駁正非是不當有所輕重公曰持法者欲得其平苟有未安豈可循默故事耶卒持前議賴以未減者甚眾一日奏事於上前英宗面諭曰聞卿文學久矣真可任也遂除仁宗實錄院檢討官神宗嗣位遷尚書祠部員外郎書成改度支故事當次遷左右史公獨求外補出知涇州為治皆有條教民懷其惠至繪其像而祠之者就徙陝西轉運副使時常平法初下公以被邊七州春旱奏免散斂事雖不報上亦稱其無隱尋改使京東過都入見留為三司判官詳定令式直舍人院修起居注遂拜知制誥賜三品服逾年為翰林學士未幾以疾請郡上遣中使勞問賜以良藥俄換侍讀學士知鄧州兼本路安撫使滿一歲召還知通進銀臺司兼門下封驗事神宗嘗謂侍臣曰陳某

論事不避權貴此可嘉也又詔掌皇子牋奏權發遣開封府前此都畿獄稍疑者多從中覆故常壅滯得容利姦上知其才特聽濶畧舊制便宜處決由是府無淹繫久之還翰苑兼侍讀充羣牧使俄實領府事每奏對嘗累刻所言多合上意人謂行且大用矣值劾司農吏盜用官錢獄未竟中書五房檢正張諤實領寺事懼有失察舉之罪遂用白帖詰其滯留狀公遣主吏持案牘示諤明無違滯而言事者以為曲徇宰屬將縱出有罪公亦不自明也罷職出知滁州自謂近臣謫守當夙夜勤職不得與它官比是歲淮甸艱食不待報出官廩以賑流殍民用安集郊祀推恩復知制誥既而改秘書監集賢院學士知廬州徙蔡州又徙潭州未之官拜右諫議大夫知廣州兼水路經畧安撫使撫輯蠻蜒遠人安之海舶大至編戶富實遂繕城郭浚溝池不勞民而功辨上賜詔書獎諭官制行改太中大夫龍圖閣待制知江寧府逾年左遷中大夫知建昌軍今上即位復為太中移密州元祐三年正月己巳終於州宅之正寢享年六十有八公為人矜嚴有禮馭家人如官府其為政急豪黨而寬善良所在宿奸巨滑畏縮不敢犯與人交不苟合一相契驩欣無間其視異己者猶冰炭然枉直必較無容毫髮雖僚友皆敬憚之然亦以此取悔在廣州時嘗戒子弟市藥物必按方劑銖兩示無過取其廉畏如此而粵

俗尚鬼有病必禱於佛祠方霧瘴薰蒸瘴癘大作公命以帑錢製浮屠像置郡廨日為之祈禱俄而幼女亦被疾禱之有應遂用私財做為一像既罷郡持去適與部使者有嫌隙亟奏其事詔獄窮治以為以私像易官像剽利數百金寘之深文神宗閱奏案其情曰以事佛故被重辟亦太甚也遂薄其責聞者乃知其非以毫末之利自汙也公屢遷謫而未嘗芥蒂於心胷躬在遠方而斯須不忘朝廷初至高密聞洮河守將獲番首鬼章生致闕下州郡當奉賀表公因表又奏疏曰陛下即位之初凡與邊事無大小疎近之臣一切廢不用於今二年四鄙無患比聞西帥獻戎俘圖賞功級誠恐由茲生事邊境漸不可長臣嘗預修仁宗實錄見康定慶歷間論西事者爭言攻討之利惟范仲淹獨異不合自好水川之敗方深懲艾願以此戒邊臣無貪小利使邊裔懷服思信天下幸甚公性至慎密嘗對上自陳不敢有毫髮欺在內廷造辟之言子弟亦不得聞以此天子尤聽信之方年少時銳意功名自謂遭時遇主事無不可為者亦既遭遇矣動輒齟齬晚歲益甚徊翔州郡猶謂尚可為也而卒不得如其所欲齋志以歿此士友所以為之太息也在郡遭疾且革矣猶不廢事前一日顧謂其子曰白太傅詩云遲迴且住亦何妨豈足為達理世事何可窮耶吾於此了然矣凌晨整衣冠隱几而逝嗚呼可謂能知

終者也公文格清峻無塵言累語尤長於論事嘗被詔修宰相拜罷錄撰求西府  
記及其他所著十數萬言諸子編集為三十卷藏於家自登朝所領職事知太常  
禮院判登聞鼓院者再判司農寺昭文館尚書祠部禮部提舉司天監進奏院知  
審官東院主管三班院館伴遣使者一勲累上柱國爵開國侯食邑千六百戶曾  
祖諱瑩祖諱光現累贈特進皆隱德不仕公之貴贈其父開府儀同三司追封母  
樂氏襄國夫人配謝氏太子賓客濤之孫女將作監主簿綸之子封樂平郡君男  
七人彥輔承奉郎彥威彥恭並先亡彥成宣德郎彥達太廟齋郎彥瓌承務郎彥武  
未仕女四人長適屯田員外郎姚甫三尚幼孫男七人靖瑞靖宣假承務郎靖直  
靖洵靖柔靖國靖莊未仕孫女一人適溧陽主簿饒蒙諸孤將以元祐四年四月  
庚申葬公於先塋之次前期彥成與季父太府絃敘公之履歷事迹屬秘書正字  
張君續為之狀抵子求銘以誌其壙予惟與公同遊場屋再擢科第登儒館歷近  
班領臺閣且五十餘年雖中間契濶而音耗不革撫事懷往不覺涕洟之沾體因  
抒長言以寄情抱銘曰

剛柔勇怯本乎性用舍行藏固有命愚達賢窮力匪競人能順之受其正猗嗟和  
叔敏而通始亨終否由其逢方當遇合言聽從一罹口語智盲聾心在朝廷迹州



郡江海雖遙言屢進再斥復還地益峻遠蹠未奮修途盡文章縱橫經世才命不  
我與徒卷懷英風偉績空沈埋刊石幽堂示方來

朝奉大夫提點廣西刑獄公事胡公墓誌銘

建安胡氏自職方府君諱順之壯年官豫章感目疾遂致政卜居本郡子孫因家  
焉今為豫章某縣人職方府君以文學政事聞於時明道景祐間數上書論朝政  
得失已退仕矣仁宗特詔許驛奏言事當時名卿莫不高其風範生吉水主簿韓  
奕始冠進士第終於一命生大夫諱及字考父初名克儉避嫌更之職方既致政  
得補郊社齋郎調饒州餘干泉州晉江二縣尉遷黃州軍事推官改大理寺丞神  
宗登極轉太子中舍知建昌軍南豐縣南豐在江西最為大邑編戶數萬多豪右  
著姓訟爭既繁胥吏操其柄前後令罕能勝之者考父夙富吏能復得家法初為  
邑尉已蘄然鋒穎摘奸鋤強故民不敢犯至是察見俗弊欲有所為故先召里中  
父老坐廷下訪其土俗利病所在鈎得其實然後為條教纖悉必盡故令出而人  
復犯者一切不貸前後發吏宿贓黥隸者九人又嘗籍其鄰里鄉黨如伍保法使  
相幾察以索姦盜邑故多掠良人子售為奴婢遠近相蒙莫肯窮究至是有犯必  
得其弊遂絕逮將滿也邑民千餘輩列疏其政事之尤著者十數條叩軍守邊監

司願留借再任事聞於朝神宗異之代還吏部試治煩令差知潭州長沙縣熙寧  
初常平法行今丞相章公察訪知兩湖募役平徭法而長沙獨得其要領奏書為  
諸縣最又被使檄均徭人禁田與毛漸吳居厚分行山崑篋竹間區處其生熟獮  
有獮悍拒命者面告以王師誅逆拊順之意無不歡呼服役不旋日而一方遂定  
賞功遷國子博士驛召赴熙河准備差遣尋通判通遠軍凡論邊事以遠斥堠謹  
疆境為先務與帥臣議不合乃以母老求便鄉帥臣以為如其言則人人欲去矣  
以此坐免既歸朝釋不問差知楚州連水縣是歲淮甸旱蝗禱神祠修湖塌一日  
雨澍蝗殪邑人以為宰君誠感所致京尹蔡公延慶薦為左軍巡判官出通判登  
州官制行換朝奉郎遷朝散勾當京東排岸司從貳卿蹇公辟命為開封府推官  
舊制京尹得辟府僚一員官制行悉罷矣蹇公面薦於神宗翊日以語執政曰周  
輔欲且仍舊自辟僚官得否執政唯諾又問胡及何如皆曰才于是特以命之今  
上即位進朝請郎坐治書生妄為詔草獄不竟左遷通判定州今樞密韓公作帥  
喜得賢佐待遇尤厚屬歲之不易北道艱食安撫監司悉以荒政之事付之于是  
開廩庾代薪芻以哺流民施設有宜民復州處在郡進朝奉大夫徙知吉州去定  
之日老幼遮道呼曰我曹前日免殍亡皆公之賜也遭母夫人之喪不之官外除

知濟州未行改提點廣西刑獄公事在道感疾至泗州不起享年六十二考父性  
 敏悟自修飭介立不倚於吏事特為明辨所至有治狀當路多推薦之端明蔡公  
 襄政事為當世表寮屬鮮有合其意者守泉州日謂人曰郡官中胡及葉康直更  
 才皆有過人者王荆公初執政聞其南豐之譽數詢廣坐曰識此人否暨見之問  
 曰久於縣道知民疾苦宜莫如君之詳也有可以補於時幸一二疏示因具近歲  
 州縣得失十數事上之荆公雖不盡用其言然獎待甚至自熙河歸過洛見司馬  
 溫公公勞苦之曰西垂舉事得志者數百人君獨失意而歸其有以乎後溫公得  
 政未嘗通訊問名聲以此不相聞終亦齟齬晚歲稍階進任又復不壽嗚呼才非  
 不試也卒不得一如其志知之者非不力也竟不見用豈所謂分定不可移耶其  
 適然耶此有志之士所以為歎惋也少好讀書然不能守章句故不以此進取作  
 詩效杜甫體往往有佳句聞於寮友喜風角術在通遠嘗予主帥書曰晨起西北  
 有赤氣冒城郭占曰其下殺萬人惟戒諸將毋擅興事可以免耳不數日景思立  
 戰敗如其言夫人蘇氏封仙源縣君子之姑也次孫氏太和縣君某官某之女某  
 官某之第七男子曰潛某官曰某曰某皆未仕二女子長適承務郎彭次未行景  
 祐初年先太師通判洪州先祖司徒公方待次郡中與職方公素以道義相契數

相過從予在侍下常應門左右時大夫與姑氏齊年襁褓遂議姻好自茲通家殆今六十年矣考父於予尊行也相視如敵者蓋自幼少從游絕去形迹一無間然葬也諸孤求銘予操觚牘感疇昔不覺涕下之沾頤也銘曰

薛宣有言凡今為吏自有資材非學能至有若考父得之尤遽豈特天資亦自家世維祖逮孫政以能聞亞尹倅戎已試吏煩賦轅植榆亦著邊勤析符為州揭節奉使曾未設施或從或躡時亨命蹇孰能付卑我勒斯文誌於羨隧

太常少卿李君墓誌銘

太常少卿李君諱規字子震其先世曰知謙自冀州徙籍於開封之祥符縣是為君之曾祖有子曰延美是為君之祖實生皇考諱從憲雖不仕居家而能教子以問學猶及其成名當君擢進士第於景祐之初并厯官為鄭州之新鄭江陵之江陵兩縣主簿而皇考始以壽終服既除調許州長社主簿就遷舞陽縣令改著作佐郎知汝州梁縣會秦邸之孫葬於邑中隸卒輩挾勢其所傷平民者君械繫於獄其家厚為之請卒亦不釋自是至其境者無不肅然徙知漢州綿竹縣以不便親養請監陝州商稅雅為故樞相張康節公所知公帥秦慶連辟掌其府機宜以行樞筦又薦之於朝累遷尚書屯田員外郎簽書陳州觀察判官公事以母憂去

職終喪為陵臺令兼知永安縣事諸陵歲時之祀皆有常制而宮嬪宦官或私有  
所厚薄君辭曰對便殿言之仁宗稱善少室山隸縣境林木茂美望之鬱然異時  
為佛寺據其地一日民有伐薪為炭而為寺僧所毆者兩造於縣僧曰此地自唐  
以來皆在寺籍碑識具存請以為驗君一見辨其偽悉治以法因諭民曰凡境內  
之山林皆得樵牧來者遂如歸焉有中使自邊州還致一山鹿命郵卒負之而趨  
道於邑中因卒有辭怒而擊傷之君暴其事乃聞於朝中人由是坐貶厯通判河  
陽官為都官郎中矣是時朝廷方擢取材臣以為三司寮屬故用君權管度支判  
官公事判使薦其才改鹽鐵判官三司歲料江湖草茶以輸京師吏常廣調其數  
至所積陳腐不可食君乃量一歲之出以為賦入之限自是歲歲省五十餘萬斤  
迄今便之改判開折司接伴契丹朝正使使者近郊辭疾欲就外館改服君使人  
譙責之曰外館宴所常服而趨是慢上也使者不復敢言卒如禮而入今上初嗣  
位詔羣臣轉對君上陳強本足用阜財安民之說其言當世之務皆有條理見之  
者可以知其志也君為人寬厚沈敏恂恂似不能言及其遇事敢斷介然自守雖  
貴有力者不可干以非義其廉畏尤有過人者秦庭故事郡官射會中的者公帑  
以銀給之君以為取之傷廉辭之違眾故終其任不赴會公自厯官未嘗役使官

匠嘗語諸子曰古人有言當官雖木枕亦不可為况什器乎在計省三年建議居多不為苟合以希進累請補外得知絳州代還若有所不釋然者將老於家遂求監嵩山崇福宮既再任而以疾終於西京延福坊之居第享年六十八時熙寧十年正月二十九日也其孤以明年七月十三日葬君於河南縣太尉鄉偏橋里之東原夫人杜氏附焉君既升朝累贈其父至尚書刑部侍郎母孫氏天水縣太君王氏仙遊縣太君配杜氏封福昌縣君繼蘇氏仁和縣君子九人男子之河南府澠池主簿卒於官舉之大理評事二女嫁潘瑜張保源皆為州掾餘早夭孫九人君平生篤於友愛弟觀未仕請以一官回授之事雖不從人多其義予舉進士時識君京師連牆而居者三歲出入相從尊酒相歡未嘗有間也後三十餘年而偕仕朝廷見其粹和淳篤之守始終不少變嗚呼可謂有常者矣銘曰

君子之德不競不練在義則固於仁也柔孰允蹈之進質而修君克保之始終無尤特立起家亞卿是秩入朝出麾皆見稱述其進既裕其退則佚嵩高巖巖聊以永日命雖不延生亦既全豐祿居第白首邱園其藏也固有子之賢其室安在橋里之原

西上閣門使王公墓誌銘

嘗讀前史觀國朝以來將相大臣子孫保有其家室迨數世而不墜門法者不十

數家而建雄軍節度使魯國武康王公其一也魯公諱超在太宗真宗朝提禁兵帥三路為時名將生忠武軍節度使檢校太師同中書門下平章事魯國武肅公諱德用在仁宗朝以高才偉略名暴鄰邦累殿藩翰再歷樞筦終始一節勳在盟府魯公之弟德基官至延州觀察使鄜延經畧使德恭刺州刺史魯公之孫二十人皆以村武聞於時繼登顯仕或遙領州郡或擢在橫班而魯公之長子東頭供奉官贈左金吾衛上將軍諱威熙初仕早卒生二子伯諱澤以強敏習知民政累典州郡終皇城使仲諱淵字巨源結髮為右侍禁閣門祇候七遷至皇城使閣門通事舍人更歷煩使出權陝州兵馬鈴轄神宗初即位勵精治道細大之務罔不修舉至於典謁替道之事無所不經聖慮者一日以閣門缺員而在職者有不閑詞令故自陝州持召公還上既見宣奏如禮顧謂其寮列曰相議當如王某可也通事歲滿擢西上閤門副使久之自請於上曰臣世以武力受國大恩臣名復在右列當竭股肱之力任疆場之事願得乘一障盡死節以報朝廷上曰朕方屬卿以職事未可遽去嘗預修閣門儀制龍圖閣直學士宋公次道典領其事宋公一代名儒練達典故每稱於同列曰王君凡事詳熟論議有本末定此易耳繼領御前忠佐軍頭引見司勾當皇城司皇城司內庭要任晨夕侍衛宮禁以歲勞自引

進陞客省副使今上覃霽拜西上閤門使初元豐三年始復州郡武備置諸路將  
官制九軍營陣定鄉村保甲皆稀濶不講之政在職者或未盡悉其禁令公數被  
命案舉初往河北訪兵民利害及當官不習職之人條例上之今永興韓丞相時  
在樞密見奏謂之曰辭簡而事該皆可施行後用其言裁制其過與不及者十七  
八又按京畿將兵河東及晉絳澤潞威勝五州軍團甲振舉其職皆稱上旨六年  
親郊侍祠大慶殿末疾暴作肩舁歸第在告且久未仕朝謁上三遣使就問以所  
苦如何治者何人日望平愈無事早出待卿往閱京西陝西兵馬既而再予告百  
日七年夏以疲憊請開局詔提舉兗州仙源縣景靈太極兩宮觀公事居家養疾  
皆出特恩非常比也既閒居每自念荷聖主非常之眷未知所報而病不能興死  
有餘責矣八年三月聞先帝遺詔強起望哭移時幾絕者數矣裕陵發引前方將  
扶舁臨哭闕門忽夢先帝召如平生既寤感慟久之以其年七月二日疽發於背  
而卒計聞詔卹其家遷季子一官補長孫為三班奉職初金吾之亡公與伯兄俱  
在乳抱母延安郡太夫人夏氏躬自鞠育推燥居溼逮於長成魯公矜而憐之賞  
延之恩先於諸子又使受學於諸儒出則從士大夫游以習禮法其後兄弟競爽  
循蹈規矩抑由母慈至而祖訓嚴故也自登朝從宦未嘗遠左右間被選為成都



利路鈴轄亦以親年為言力辭不拜延安後公二年歿疾且革猶曰吾不得死於吾子之手為大恨審斯言則平日之承順顏色有以慰母心者可知也平居樂易若無不可者然剛中謹嚴不妄舉動喜飲酒而未嘗至於酣醉善音樂而不以為能事接人初若簡淡久而益親桂人歐陽闢旅居京師不求自達公一見相契合如平素遂留館於家日與講論義理十餘年無少間濶至今不忍舍去自少長不雜交遊不妄出入視權門尤畏懼與今新州蔡丞相有舊新州當政日每相招延則一往旅見語不及私子弟或問故應曰仕宦當爾爾輩亦宜知此則寡悔矣神宗因問語及對曰臣愚不能周旋人事耳非有他也三使契丹北人首訪其族曰得非兩世太師之後乎答曰曾大父大父也及燕射屢中的眾駭曰是果有成法也四為南郊明堂御營四面巡檢皆以辨職蒙賞初仕時年尚少入侍殿閣以勤恪著稱仁宗已識其姓名嘗以御飛白字賜之後詔伴高麗使人南苑燕射神宗以御弓一御箭四賜之是二者皆羣臣所不得與及班列中咸以為榮遇也夫人蔚氏殿前都指揮使保靜軍節度使昭敏之孫封永寧縣君治家嚴飭雖累世大族而門內清約室無玩好旁無姬媵有若儒素熙寧中諸父俱亡伯兄外守邊要家事悉以諉公拊循羸弱教率羣從使就問學賙給均一內外欣欣以睦如是且

十年無一日替舍內有猫相乳者人以為異馬子四男子曰任內殿崇班曰价供  
備庫副使曰侯右侍禁曰侁右班殿直六女子五適人一未有行壻曰明州錄事  
參軍夏大同右侍禁張宗陶蔡州汝陽縣主簿李元弼右侍禁西京鳳翔府司理  
參軍張克勤孫九人曰瓊三班奉職曰珣曰璠曰璟曰璞曰璨曰瑤曰琳並  
未仕孫女九人並幼王氏之先世為趙人而占數常山真定縣自魯公徙冀河南  
府密縣今隸於鄭故又著籍於鄭州管城縣諸子卜以元祐四年八月戊申舉公  
之柩葬於新鄭縣旌賞鄉尹固村前期任以狀託銘於予其請之勤至於一數且  
曰先人操守介特平生交游雖多而知之者鮮非公者記終始則懿行遺美懼無  
述焉予惟疇昔之好重之以熙寧初同使契丹尤相親愛每聽其言多及朝廷政  
令之要問其所趣皆忠義謹厚者所尚之事其矯計刻覈之行則曰不能為也予  
又熟其伯兄之所存亦相類于是竊歎曰王氏家訓如此宜乎世有其人今雖亡  
矣而後嗣競勸若然其子孫又有成立者則門構益不墜矣因為之銘銘曰

璠瑛之珍產於荆崑公侯之貴亦出名門懿彼上閤遐哉慶源常趙之族將相之  
孫少登顯職多聞博識贊揚命令雍容謹飭神宗所知中外宣力受命按兵勤躬  
體國資適逢時數亦多奇中年而逝雅志終虧岡陵鬱鬱茲新密世德不忘曾

雲襲吉

贈右屯衛大將軍趙公墓誌銘

公諱叔趾秦悼王諱廷美之裔孫曾大父德彝為潁川郡王大父諱丞矩贈相州觀察使考諱克循追封東陽郡公惟王之子孫在屬籍中特為繁衍而朝廷敦睦之厚無有疏戚恩禮一均故公生五歲以賜名例授太子右內率府副率十餘年而遷至右千牛衛將軍年十九不幸感疾而逝詔贈右屯衛大將軍茲所以見思卹始終之至也准狀公東陽之第七子母曰安定縣君彭氏生於皇祐辛卯四月六日卒於熙寧己酉五月二十七日其為人純和質重喜親師學於父母孝於兄弟睦而儀觀甚偉在稠人中見之者無不聳然以恭是謂公族之秀者也以服父喪繼罹國恤故未及昏媾其葬也以卒之年冬十月十三日從故相王發引而西以十一月十日祔於汝州梁縣秦王之墳次有詔詞臣為之作銘銘曰

壽昌縣君王氏墓誌銘

皇朝宗室之盛敦睦之恩至其子孫之嘉吉禮一皆主於朝廷凡通昏於諸臣之家非夫氏族之著而婦事之宜者蓋難其選右武衛大將軍柳州刺史叔頤故夫

人壽昌縣君王氏其人也夫人之先為河朔大姓後以仕宦徙汴今占開封曾祖諱審琦忠武軍節度使同中書門下平章事追封秦王其配曰秦國太夫人曹氏祖諱承德東上閣門使會州刺史其配曰西平郡君石氏父諱世厚內殿崇班其配曰平原郡君趙氏此世族之著也夫人資質修嫺和柔敏慧其族中嘗推異之年十六而歸宗邸奉事尊敬動有禮法治家以寬嚴稱在夫室七年謙恭柔順無媚妬之行左右有過失則以理責數未嘗施鞭箠而衆自畏稟閨門之內雍雍然間無言此其婦事之宜也年二十三不幸早世其初被疾甚力武衛憂見形色為之歷訪醫診砭餌交進繼之以禳禳之事無所不至其亡也武衛念伉儷之賢淑悼其不得偕老喪禮之外又為之屏去葷味日誦浮屠言以資冥祐雖親戚開勉久益不廢非夫好合之德素茂則安能感其良人若是耶夫人以熙寧二年三月二十日卒於宮邸以其年十一月十日葬於汝州之梁縣秦悼王之墳域先姑李夫人冢次男曰擇之今為太子右內率府副率其二男一女皆先亡銘曰

相王之孫宗侯之婦有美淑質云何不壽生宜厥家葬從先姑令問不已納銘幽墟



蘇魏公文集卷六十一

宋太子太保右僕射同中書門下平章事司空魏國公蘇頌撰

逢年

裔孫萬靈重棊

墓誌

耀庭

龍圖閣直學士致仕李公墓誌銘

龍圖閣直學士正議大夫致仕上柱國隴西郡開國公食邑三千戶濮陽李公公儀年八十四以元祐四年十一月某甲子考終於濟南郡退居之私第終以正也以紹聖五年二月某甲子返葬於濮州鄆城縣遺直鄉柘鸞里葬從先也前期嗣子駕部員外郎孝純以季弟密直君承之所敘狀走書南徐請銘以識其壙予惟先世並游之舊甘泉同僚之契紀其功伐書於樂石云云儀諱肅之公儀字也贈太尉諱遜之子贈太師中書令兼尚書令蔡國公諱護之孫贈太師中書令諱珣之曾孫天聖中以世父故相文定公乾元節推恩奏補為將作監主簿初命監大名府軍資庫年少氣勁早有才譽大河溢張家口府命督修冠氏縣堤爰薪出納之事畚築力役之政晨夕親臨如期而功就冠氏民數千詣府請為縣宰府上其事朝旨如請既蒞職視

民所先急者宿寇根據鄉疇人不安其居乃案令使鄉村置鼓盜發擊之遠近聞聲而畢應民既知教因親臨試鼓鳴而保伍麇至自是盜為衰息都轉運使李公弦奏為御河催綱景祐二年河決橫隴又奏巡護金堤滿歲無溢蠶之患擢通判德州改澶州慶曆二年契丹遣耶律仁先劉六符馳禮赴闕將過郡而病譙橋頽缺即謀於郡守曰吾州實景德初鑿輿誓敵之地今泛使來而城壘若是萬一朝廷有問則土木暴興其擾甚矣惟先事為備可以寬責於是料工度材增罅補漏成屋千區已而果有中人銜命檢視指顧徙置不日而棚樓一新使者驚異時我先人自禁林貳樞副任公出使修建北京往復城中目其治迹歸言於上擢知德州未幾以施黔蠻首田忠霸寇邊被選提點夔州路刑獄公事到部徑趨邊砦諭諸蠻以威信眾遂伏竄璽書褒其勞就移提點開封府界縣鎮公事賜五品服出知沂州州人常苦沂水敗橋水涸修復之患乃詢於眾咸曰家戶輸財無有寧歲於是教為輿梁使可徹置植堅木為杠橫巨材為棟夏秋撤去至冬復舊暫勞永逸眾以為若是便於今不廢河北歲歉流殍至郡視其強壯者募為兵羸不任者鋪以庾粟抵春遣還兩得其所歷深澤二郡徙荆湖南路提點刑獄皇祐三年廣源儂智高犯邕管侵掠十餘州朝廷至遣大臣經治湖湘密邇賊境使者實任其

責於是親督諸郡兵往禦其衝廣東蔣偕王正倫追賊湖嶺開失利又率兵丁往收其餘燼招輯散亡躡跡討襲過臨賀賊遂引去一境帖然經制使狄青孫沔言狀朝廷第賞特轉尚書主客員外郎荆湖北路轉運使辰陽彭仕義之叛被詔親行處置乃畫攻取策授郡將宋守信進兵窮討徑山岷篁竹之險兵不得前又為之募敢勇士為鄉道直抵溪州破蕩其巢穴賊平以太夫人高年求鄉郡自齊易海就選江東轉運使徙兩浙時以荆河水災籍諸州役兵疏濬堤塌不勞民力而蘇秀之患除移成都路改河北賜三品服遷江淮發運使是時方治汴堤創木岸以束湍流久之未就特旨召起相府叅議於是有都大提舉陝河之命既而堤岸卒成以親喪去職服竟由三司勾院進度支副使厚陵之役百費所出皆先期應辦公私無擾除將作監再領發運使因對神宗皇帝問西夏諒祚犯大順城事數奏合旨翌日拜諫議大夫知慶州既至治戎政嚴攻守之具將佐稟命常若寇至敵聞聲而戢數月移瀛州熙寧元年河北大水地震數州累日不止城壘廩庫公廨民廬摧陷幾遍乃躬冒泥潦中指喻僚屬為之區處倉庾粟麥暴露者則結草為囷圖而以儲積之沾漬者出以賑流冗編戶之無蓋藏者為芟舍以居處之公宇亦如其制又嚴盜賊之禁下令民敢有乘災剽攘一切以軍法從事後有叛卒



夜掠民財立捕斬以徇人遂安息上聞其措置有緒特遣中使勞問賜茶藥以示優卹踰年拜天章閣待制權知開封府出知定州召還權三司使事出知永興軍換青州改齊州提舉南京鴻慶宮三命皆自請也過都留提舉中太一宮判將作監元豐元年拜龍圖閣直學士知鄆州占謝曰上謂之曰鄆介濮齊之間在鄉為便矣州自曹村決口之後積水為患雨下車為之相土高下創築長堤請民丁萬人於朝一月而成水患遂除四年告老優詔提舉兗州景靈宮太極觀遂居濟南七年致為政而歸退休六年而精力寔健每歲時節序率子姪輩往濮上祀先隴合族以食欣欣然步趨笑語少年不若也早通竺乾之教持心行已哀無隱情常曰吾無他長惟至誠待物而已故其啟手足之日疾無甚苦忽語諸子曰人生一夢耳寂爾順化豈其生也操行純固故其往也若有歸焉夫人宋氏前十一年卒於京師追封延安郡夫人子六男子長即駕部君也次曰孝謹通直郎孝應宣義郎皆先亡孝錫通直郎孝益宣德郎孝常承事郎五女子孟李皆出家為尼曰智滿號明覺大師曰慈妙悟真師三壻大理寺承韓鎮國子博士張照宣義郎王仲康孫男二十三人仇宣義郎傳僅仔侍倚皆仕銓選為州縣掾佐曾孫二十二人公儀性明達周知世務而於吏事尤為精密敏而能斷主於寬平不戾文法其治

郡也不為條教事至而應初蒞東海燁訢滿庭下獨於儔人中指一叛卒訊曰若非前九年沂州犯盜而亡者今尚不悛耶卒寘於法聞者畏惕其奉使也務舉大體不以小察為明未嘗以細故案吏吏伏其公其立朝也直以奉上勤於濟務尹京主計不累月以治最聞凡七領州節皆近於鄉鄰而濟南三至兩為提點刑獄五為轉運使而成都以親年免行制溪蠻禦寇寇績效尤顯六領方面並兼一路安撫使而慶州又兼經畧使馬步軍都總管高陽捍患之政至今人猶能道其事兩為提舉在京諸師庫務皆以疾辭府省特恩授之再至又兼羣牧使叛三班其別使則體量陳亳水災相度張馬糾門分綱都城水患護魏王葬事賀大遼生辰皆稱所職出入中外六餘年自九品至三品更十六官用歲月轉者少由功最遷者多兩拜內閣所准實迹可紀而無悔尤晚歲以學士歸老里第逢辰錫福既貴而壽且康善始令終仕宦如公儀者幾希矣少有至行年十四時從文定公南遷衡陽至復相不離左右公薨又請沂州以奉裏事在德州聞先公訃即時徒跣赴殯居太夫人之喪廬墓三年不入城郭曹村河流壞先壠躬募鄉民負土增葺季君密直君生數月而孤親為鞠育誨導以至大成密直君常曰承之奉兄如父兄之視我如子因省兄陳留過都神宗特召見勞問面諭曰卿家可謂一門忠孝其天平除

書有父子忠孝兄弟顯人之語當時賢公名卿多以端方目之王沂公呂許公杜  
祁公富鄭公韓魏公最為知己冠氏則沂公之薦夔路許公祁公所引用汴則魏  
公委擇其為君相稱舉如此李氏世占濮上為東州望族自文定公薨未數年而  
公儀兄弟以才名相繼登朝元昆東之太子少保仲兄徽之正議大夫亞弟及之  
通議大夫立之中散大夫並以年德致仕而終季弟密直君與公儀同時為學士  
今子姪踐省寺使一道者又數人諸孫及曾仕與未仕四十餘人克紹家訓有後  
之澤其可量乎予治平初為度支判官與公儀同曹共事相好尤篤追紀平昔愴  
然於懷系之以銘言不逮意銘曰

伯陽苗裔飛將來雲山東著姓濮水名門相有遺直慶貽後昆弟兄鳴玉子姪輔  
軒藩朝互陟霄鶴齊駕猗歟內閣克承世芬聲馳初仕惠布黎元公卿交薦州使  
宣動梁沂罷斂木返通堙上嘉乃績詔錫褒言尹京主計劃藩軍中外更踐寵  
數便蕃再留持橐懇丐鄉粉玉符琳館汶水仙源遂還印綬退老邱園公生鼎族  
仕邁華勳壽彌七紀家有曾孫歸全新第返葬先原始亨終吉本固枝繁垂於永  
久考以斯文

少府監致仕王君墓誌銘

由京師舟行東南五百里而近郡曰汝陰地瀕淮潁厥土良沃水泉魚稻之美甲於近甸言卜居者莫不先之故自慶曆以來賢士大夫往往經營其處以為閒燕之地嘉祐中予忝麾守時長樂王深甫徙閩籍占著郡內未幾潁川辛成之罷郡鄂渚過境留居而同郡王君隱甫來自壽陽治第中郭常與二人者游皆以僑寄遂為鄉黨鄰里焉深父子友也成之亦予從外舅在郡過從最數因而接君甚款每燕游造適而三君未嘗不同之既而成之調官而還未遑卜築君獨遺遠宦情樂此勝概後雖腰郡章臨九江遠去數千里而心未嘗忘之其滿秩也年才六十六矣去而謂人曰吾里有第鄉有田而子有祿可以休矣遂還鄉閭衍衍自適而論者亦稱其勇退為得計後三年六十九考終於新第克葬於汝陰縣旌義鄉新安原又十二年以夫人張氏之柩合祔焉從吉卜也君諱山民隱甫字也其先臨汾人曾祖徵贈太子太保祖嗣宗左屯衛上將軍致仕贈太師諡曰景莊父九齡感德軍節度推官累贈尚書工部侍郎妣溫氏追封仙遊郡太君太師在祖宗朝以文學登甲科以才謀致台輔奮然聲譽見於一時捐館許田就葬其邑子孫復為長社人君用祖蔭祥符中補將作監主簿其通閩籍服五品進陞卿寺出典州郡紫衣金章爛如也其為人謹介自持不撓非法在家無子弟之過居官為辨職

吏始監荆南越州江陰軍酒稅擢知温州永嘉縣歲餘徙知賓州通判壽密泉安四州最後知江州凡遷秩十有五等而位正監歷官十政所至雖無赫赫稱而課局有羨吏治無廢不為矯激之行以取當塗之知然仕宦幾五十年未嘗經於吏議在賓州時年尚少已能修舉政令溪洞獠蠻聞其風無敢犯境遭歲大穰郡素不積儲穀價猥賤君白外臺發庫錢廣平糶以紓民勞俄而歐希寇宜州官兵進討軍需轉餉卒賴賓廩以濟部刺史上其狀於朝法當遷秩有司以不滿數旬而格其議君獨無一言以稱伐六安芍陂堤壞久不治君議調夫繕完躬自董役既成而歲大旱民獲其利為多凡此足以見其不苟簡於職事不汲汲於進取他可知已始娶某郡孫氏封永康縣君早亡強夫人繼室也工部侍郎正論之孫女封京兆郡君柔訓靜專能盡婦道家庭雍雍而無間言子男七人曰泱通直郎河北轉運司管勾文字曰濟巴州司理叅軍曰泳未仕渥開州萬歲尉漸承奉郎監開封府襄邑縣倉草場沂華州浦城縣丞濤湘州司理參軍女一人長適鎮安軍節度推官監解州解縣鹽池某次適宣德郎曾孝廣孫十五人初君終於熙寧四年夏四月庚辰葬以其年十月甲子合祔前期一日泱等泣訴於予曰昔我曹大夫太師景莊公之勲將行義應行於朝公為奉常實由一言以定其議而聲光煒煒垂榮至今惟

皇考大監仕歷四朝伐閱無玷而退嘿自守不求顯聞故當時公卿無深知者公昔守穎嘗蒙顧遇不朽之事敢復干一言以傳取於後其婚孝廣又從為之請予惟平曰之雅固不忘也又嘉君有子能顯揚先人之善而其所稱述者皆予昔之見聞也故得以詳載之夫恬於仕進者官不漸達要之道志意而已祿不漸侈要之代勞力而已名譽不漸顯聞要之遠羞滂而已若君者智能遠害而殆於趨時力可任事而勇於知退方其未衰休休焉以歸籍素資以享宴安之樂顧其所得豈不多乎孔子所謂言寡尤行寡悔祿亦在其中矣其少府君之謂乎銘曰

王出汾陽系於通祖太師始大遂遷舊許宜爾子孫或榮或處少府來穎樂彼風土卒葬其地在淮之泚後十二年夫人始祔卜人曰吉利其後嗣太師立朝功崇譽著少府恂恂與物無忤夫人成家允矣健婦積善相承後昆是裕如卜者言當享榮祚

朝請君辛君墓誌銘

嘉祐六年仁宗謂輔臣曰科舉取人拘以條式敦朴有道之士或至棄遺是豈朝廷求才之意耶乃詔諸路州郡訪求遺敦遣詣闕試而官之時故相右僕射兼侍中判許州賈文元公洎京西轉運使提點刑獄凡五章列上長社進士辛君廡

化光文藝節行鄉里推服召試西掖中選者十八人化光在第四特賜進士出身試秘書校書郎知河中府永樂縣當時議者咸謂聖主崇獎儒行恩及草澤實曠世未行之事翰林尚書宋景文公遺奏以為取士不刊之法其為天下稱贊也如此化光尚書比部員外郎贈光祿大夫諱有孚之子駕部郎中檢校太府少卿致仕贈戶部尚書諱若冲之孫故參知政事太子太傅致仕贈中書令諱仲甫之曾孫胄出隴西金城之世自汾州西河縣再徙潁川令為潁昌府長社縣人化光少以名家子向學勤刻綜貫書傳與士大夫遊當時賢公名卿至許者莫不推挹以為遠器累舉進士不偶既壯矣自謂命之奇隻不可強進杜門養志幾十年而從聘命治平元年英宗皇帝立諸王宮大小學選儒學之官為教授使以經義訓宗子化光自永樂召為韓王冀王宮小學教授嘗以謂貴游子弟以諸生法約束之則惴惴而難入故為之別立課程日誦若干字閒則大集講解所誦書習為文詞庶幾漸摩成性若自然耳於是宗子以其規矩簡而易行莫不悅從未數年而學益進能循禮法不為非義緊善誘之益也以歲勞遷大理寺丞仍舊任凡六年求外補差通判火山軍故相韓康節公與化光鄉友也帥并門鎮武定皆奏辟管勾安撫司機宜文字累遷尚書屯田員外郎官制行換朝奉郎府罷還審官格以常選

王宮洎機宜雖積十年四任而未嘗實歷令宰不得升秩復當領邑會機宜罷舉  
取嘗為此官者為首選化光欣然不恤復領真定又二年仍未外任由是朝廷知  
其才久滯常調用為光祿寺丞遷太常博士逾年遷為王府記室叅軍再轉朝請  
郎化光為人外溫和而內勁正與人共事推誠相議論有不合但不言雖不從未  
嘗變色後或議奪而氣益恐怍自以為事勝而怨憎生非孤拙所宜也故在王宮  
及國邸二王多詢其故事特加禮敬盡得內外之歡心其去也從學者至涕泣流  
連不已雖給使皂隸輩亦遇之以禮未嘗怠忽其周施於事皆此類也在帥府雖  
邊書叢委皆悉力裁處動中機會帥長賴之以厭折多矣天性孝義愛親戚卒大  
族也昆弟皆先喪逝而貧居食口益眾化光月給以俸錢僅二十千此外有婚喪  
又輟財以周急內外屬之居京者遇四時節序飲食之饋未嘗絕乏死之日家徒  
四壁族人住俸所失所者七八家平生無他嗜好獨嘉賓客善談諧至於歌嘯終  
日不倦營家之有無以供饌具故士大夫無不與之交好者平居康健未嘗有疾  
一旦暴得腹瘍漸不能興伏枕月餘而卒時元祐四年七月一日也交親聞訃莫  
不嗟戚而痛善人之云亡也予與戶部侍郎韓公持正給事中趙公無愧往撫其  
襯慟哭相弔右丞相范公堯夫尤深惻恨不得臨其喪曰遣親賓往問其襄事周



恤尤厚嗣子公琬素承清白之訓家無一簪之貲舉喪難苦予之息喜化光甥也  
使往幹助得以盡禮以其月二十八日舉櫬還陽翟以某月某日葬於三封山某  
穴從先某官穴之左夫人王氏某官之女賢淑善治家前三年某月卒先祔大窆  
自夫人之歿化光自以室無主饋忽忽不適蓋平居奉親待賓客所以周旋無間  
者皆內助致然故也一子即公琬以致仕思補太廟齋郎二女長適臨潁宿壽昌  
亦其甥也次幼在室予與化光友且親道術相忘中無間然每杯酒意適則歌呼  
縱放坐忘形骸稍隔濶則以為不足及病且亡予為之慘慘者累數月不能已蓋  
念相知之難得也其葬也公琬請文以誌其壙遂為之銘銘曰

辛系隴西金城著姓中徙河汾數世不競流光自遠是生中令佐佑神功入預大  
政歸老潁川厥居以定于孫蟬聯衣冠益盛化光特起出駕封軺一命宰邑躬掌  
民徭宗藩典教邊城贊條五參帥募遂巡不超太常光祿預議中朝上選者老典  
記王遼博識多聞納言敏行善與人交久而益敬或出或處安之若命胡不永年  
遽至大病歿有遺恩葬從先正既安故邱復貽後慶

朝請郎致仕李君墓誌銘

朝請郎致仕護軍賜緋魚袋李君諱况字希荀秦州海陵人子仲妹婿也曾祖祥

祖載家世力農自業不求聞達鄉間有長者稱考容少以豪義自奮起家為三班  
官非其志也乃還鄉教二子以為學問為求良師友躬自課厲以至成就使舉進  
士相繼取科第仕歷州郡卒用其升朝恩累贈正議大夫配朱氏追封同安郡君  
長子曰洙累官朝奉大夫次即希荀也大夫宰邑典州治有異等其為政簡而明  
遇事乃斷不預為條教故吏不能逆其意以用事竄蠹以此亦自息予治平中為  
淮南轉運嘗薦其高郵嚴狀後得官多遠僻未及為朝廷應用而卒希荀治行大  
抵相近蓋昆弟講學有源故政事皆不撓也始予妹適宋氏未久而寡子幼未有  
所從有言希荀家行慈睦可托遂以歸之希荀視宋之子猶子也思勤鞠育若出天  
性然加之以矜憐惻怛及長成為之冠婚如禮卒使宋孤視已猶父無間然人以  
為難也咸謂推是心以施於有政則安老撫弱風化未俗易易也希荀質性淑茂  
襟量夷坦與人交盡誠無隱言談洞見底裏於親舊間雖狎侮造次不失謙恭急  
人之病甚於切已當官勇於敢為用法主平恕而未嘗失有罪持議不阿優柔盡  
禮或所見異同至於辨爭而同僚不以為忤蓋知其誠意非他也初為真湖二州  
掾端太平二郡從事時年尚少持文法報期會久更事變不能過也州委案蕪湖  
縣遺火事迹大所起日煙燎無從來悉眾救撤燬燭連日不息此天災也豈人力

可禦乎於是為之辨明白州使官吏得免從坐用薦舉格改秘書省著作佐郎四歲進本省丞知潭州湘潭縣就徙通判衡州每病衡守疾惡太過徒隸為引視民有犯已決猶留州役即有代乃釋為引瘡疾律白守罷之屯戍禁卒賊殺有罪不殊吏以戍兵肆惡當軍法從事詆曰州縣接蠻境其實內地卒非行軍猶在營也自宜處以常法舉不能奪元豐官制行由太常博士換承議郎三轉至朝請歷通判太平秀州有故人子為嘉興主簿暴卒知其貧不能舉喪為出已俸賙之遂得還葬未幾同提舉三門輦運以廣濟十軍歲挽漕舟最號重役至冬當休而白波常託河隄備虞及期不遣斃於凍餒者十六七於是為坐放凍令籤白波放還得稍憇洎外臺計省交上其勞朝廷稍欲試用選知海州未行以疾請納祿守本官致仕詔下一日而終於清河之官舍時元祐五年十二月某甲子日享年六十二希荀自解巾褐迄啟手足凡四十二年歷十一官九更事任並以資履敘進未嘗干功賞倖超擢所至皆有善課而無毫毛過失不與物競而職事常辦年雖未壽而克保終吉豈積厚所來者遠耶至今淮甸士大夫語人物者獨稱二李而云樂善好義希甸又過之可謂善人君子也初娶譙郡曹氏繼某縣君繼以予妹封海陵縣君一子曰峒用致政補太廟齋郎今為泗州臨淮主簿四女三適人一早卒長

婚蘄州判官章觀次進士郭景亮次宣德郎陳師常一孫尚幼李氏居海陵世數遠矣死者皆葬焉而城郭褊隘歲久居者益眾瀕海烏鹵埤薄而葬者又少岡陵吉壤希荀既仕宦數歸患其然往來吳中樂京口土風且密邇海陵蓋有意居且葬也未及而卒峒探其遺志遂謀葬丹徒筮縣之大慈鄉道仙灣西卜之原吉以紹聖元年二月己未厝柩於幽堂事已奉母氏葺居郡城遂著籍焉一日峒號泣謁予曰先人行義德業早蒙重援今去秦徙潤當有文以誌所遷之由非吾舅莫得其詳予知希荀者也平居愛其善論議有推己及物之志亦欲乘時施為然安恬自信不汲汲於進取昔嘗與故相蔡公共事相期久遠情好尤篤蔡公秉政數招延勞苦勤厚希荀對之但問無它通舊故笑語如平生無一語及榮利蔡公亦悉其雅志終不及引用而去其所以仕不至顯大者未必不由此也可無述焉銘曰君子恭寬信敏而惠悃福無華古之良吏孰克有之可以言治我黨荀也其庶乎是侃侃惟荀氣充貌溫有容雅度可復誠言在剗能繼靡怨惟思渾純篤厚孰見涯根江淮濯纓玉畿結綬鴻陸始漸驥路俄驟出將漕最擢分符守資適逢時假年弗究厥生海瀕其復河津孤悻負柩卜霽京原民懷遺愛士想清芬德必有後其在嗣人

蘇魏公文集卷六十一終

蘇魏公文集卷六十二

宋太子太保右僕射同中書門下平章事司空魏國公蘇頌撰

逢年

裔孫萬靈重槩

墓誌

耀庭

叔父衛尉寺丞景陵府君墓誌銘

叔父諱繹字謀甫謹案家譜蘇氏自唐許文正公瓌至叔父凡三徙籍今為安州景陵人許公之曾孫曰奕元和中終光州刺史子孫因家於固始光州之四世孫贈隰州刺史諱益自固始從王潮入閩又為泉州同安人實生我高祖屯衛府君諱光誨國朝太平興國初從泉帥陳洪進八觀以前漳州刺史拜左監門衛將軍生祭酒府君諱祐圖歷漳州司馬祭酒生復州府君諱仲昌舉賢良擢進士第逾月覆落換三班官歷閤門祇候左屯衛將軍提點荆湖南北兩路刑獄知宜邵復三州復州年七十叔父次第五門中號七君少力學有家法年十七從進士以病臂不克赴試遂棄詞業專精文史陰陽星歷占筮術數百家之言靡不精造喜推考人生年月日時以五行星數參驗休咎合若符要又學道家養生吐納禪宗

止觀傳心之說因侍官景陵在郡服先府君喪遂占數馬方是時我先人在翰林  
乾元誕節泊南郊禮成皆得推恩子弟數欲薦為仕叔父辭以病無妨他子弟之宜  
薦者先人善之遂任幼弟緹及其子觀皆為京司官自是叔父不復有榮進意結  
守近郭闢為賓館躬殖財產才取贍足日與鄉人為飲食宴樂之好凡賓客過從  
無問高下色目一接之以禮至於館餼祖行亦不以菲廢閒則談道真咀禪味考  
運命閱骨相人有咨訪皆盡誠為之評析一經其品目後悉如言於是要塗要官使  
車過客至郡者必造其門若今門下章公子厚樞密安公厚卿龍圖閣王公勝之  
皆嘗因使咨訪期以遠到諸公至今稱道不已士論莫不伏其鑒裁也年少時尤  
好黃白點化之術一日有道人過之云我蜀人也今老矣願有秘訣欲求人而授  
之得其人則我將逝矣因命取水銀一杯坐開銷為白金叔父驚異而未敢遽問  
姑留寘於客館其夕道人奄化遂貨其所銷白金為之具衾櫃買地以葬其資費  
適取足焉因歎曰茲事信亦命乎吾平生接方士多矣無不懇祈而力為之每患  
未盡其術今遇異人求我而我不契其心豈其是道人先知數盡假手於我以送  
終乎而吾不得受其術是命不偶也何必復勞心乎遂搜索故所蓄方藥盡焚棄  
之終老不復語黃治事聞者歎其信道篤而知命深也治平中以顛陞朝籍恩授

大理評事致仕再遷衛尉寺丞居常起居無他苦一日嬰小疾遽令趣召諸子及外姻之在遠者俄而畢集即語以後事翌日書禫偈一闋捨筆而逝時熙寧十年某月某日也享年七十有二孀氏劉溫州平陽縣主簿諱半千之女平陽早有時譽先祖同舉直言被召至闕下會罷六科從進士一命而終孀氏柔婉和惠善處家事方叔父閑居延賓客飲食歡甜夜以繼日如是數十年而中饋未嘗少乏交親稱其賢明前一歲捐室三子長曰頽季曰頽皆舉進士仲即頽也博學有文詞官至殿中丞歷監管局三司主簿知汝州葉縣所至有治迹公卿多器其才能方見任用以二親連喪不勝毀瘠逾月而卒一女適承議郎太僕寺主簿張承嗣頽頗力舉襄事以元豐七年某月某日奉二親葬於某縣某鄉某里而頽祔於某方從先志也某自總角即從叔父之教告在子姪行待遇特異自聞喪計以官守道遠不得哭於靈幃固以痛恨矣今先遠有日又不得挽柩執紼以盡哀情其愴惻奈何竊惟叔父以文學遭聖世曾不得一試有司以高行聞當時而又不得一達朝廷終以末疾自棄卷懷不用事可惋也然端居里閭閒燕自適康寧壽考終其天年顧其所得亦不為少矣若考其所履則在困而安能任命也居遁不晦善處窮也清高博識似司馬季主嚴君平而心無適莫不厭遠於塵俗文雅放達似劉



伯倫陶靖節而躬蹈規矩不輕傲於軒冕蓋清機遠覽俯仰隨時得君子出處之宜達天命中和之理宜乎為宗族之矜式而士大夫所以推挹也諸弟以某周知宗事請文誌壙某雖粗記緒餘而識致不敏安得發明叔父高遠之趣姑彷彿其言行載之於銘銘曰

古之君子隱居求志山林朝廷出處一致或止或行與時皆逝困於物者反為物累惟我叔父行完道備學通精微性資恬智初遊詞場豈不欲仕遇困而休非為傲世卜居江湖棄遺勢利造適交親笑談道藝尊酒不空清言有味士聞其風不遠而至于將人倫景純占筮託意寓言聊以卒歲復魄沔陽流光漢溼從子勒銘以告來裔

長安郡太君高氏墓誌銘

鬱林太守朝請郎陳君將以元豐八年十一月甲子葬其先太夫人長安郡太君高氏於潤州丹徒縣白菟山之某原前期琢石以屬其甥蘇某為銘且誌其卜遷之所由云惟陳氏世居泉南歿則葬其邑至朝請君昆弟少仕宦奉夫人居江淮者二十年不復南歸既而遭喪家吳中後議襄事卜者丹徒土厚水深宅壙於茲吉莫大焉於是遷其柩櫬而安厝之君子以謂得禮之宜也夫人之先潁州長社人父

諱守成以材力顯於時與故東上閤門使張昭易同給事晉邸太宗纂極擢東頭供奉官方見寵用不幸早卒詔恤其家事政昏姻多通貴戚夫人生而警慧柔閑謙重出於天質非姆訓之所及見者皆竒之為之擇名配久無可者於時內閣穎川公初擢進士第調嵐州軍事推官以二尊高年思得淑人以佐膳饗聞夫人在家之賢因以禮請遂合姓焉穎川公孝友清白為朝廷偉人而夫人恭靜和順能成君子之志奉上率下舉動有法周其族人曲盡情禮無不得其歡心者舅姑則曰順婦也姪娣則曰賢妣也六親則曰仁姑也有家七十年中外無一間言前志所稱賢明辨通節義者夫人皆有焉穎川公諱某終龍圖閣直學士左諫議大夫開國本望累贈某官三男伯曰紹孫太子中舍通判處州仲曰繼孫國子博士並卒季曰維孫即朝請君也三女長歸於我先人翰林侍讀學士河陽府君實生小子某等以夫子官封河南郡太君次適故鄂州節度推官蘇玠幼適國子博士鄭几夫人享年八十九見其中外孫數十人康寧貴壽考終官舍豈非寬仁厚德福報之所及耶銘曰

元聖有言曰仁者壽夫人之賢天錫之祐寬裕惟德肅雍乃儀曰婦而順曰母而慈積是慶善宜其家室既享永年亦保終吉泉山故塋河曲新邱土壤雖隔魂氣

同遊卜人曰食來裔之利識以斯銘世世無敵

萬壽縣令張君夫人蘇氏墓誌銘

西出廣陵故城十三里所有大墓在蜀岡之南曰馮家原集賢張公之所宅也集賢之次子曰潁州萬壽縣令挺卿斯立祔其壙西南隅之庚地堪輿家曰山連兌乾水流丁未其前望京江諸山拱而揖之皆吉符也元豐八年春正月集賢之孫天長縣主簿充南京國子監教授康伯昆弟將葬其偏親彭城縣君錢夫人得吉卜矣又舉世母武功蘇氏之柩同用其月己酉厝於斯立之右方幼子獐老從之蘇氏予長妹也我先人太尉公翰林府君晚得女以其秀且慧故特撫愛之始稚而孩已能言漸誦章句少長而承禮義之訓又能秉筆為詞語及筭擇配且久乃以適亳州司法呂昌緒昌緒故相許文穆公之孫也甫三年而寡後四年獲歸斯立斯立賢而有文章好學不倦平居刻苦奉養簡簿吾妹從其所好未嘗見於言色又七年而斯立卒且葬矣乃歸窆太夫人河南郡太君日侍膳外則以未亡自處不復接外事惟閉閣冥心誦佛書而已雖親戚亦少有見其面者熙寧五年從予奉板輿守東陽二月十二日通桐廬縣漏港灘失舟吾妹年四十二與獐老暨予一子潁士同日而亡予侍太夫人悲泣之哀甚踰年還喪維揚最於開元佛舍

又十三年始克同穴張氏三子長康直用斯立之舅翰林錢公補蔭為郊社齋郎次康壽次康叔即禱老也並相繼夭闕斯立遂無後而呂氏二子亦卒二孫尚幼惟是窀穸之事皆教授洎其尊公前利州路轉運判官通直君主之乃得如禮嗚呼可哀哉銘曰  
長江之陽屬岡西其音在商墮者宜是為斯立之世墓嗚呼吾妹今從之

彭城縣君錢氏墓誌銘

元豐七年二月揚州天長縣主簿充南京國子監教授張康伯昆弟既終其母彭城縣君錢氏之喪以尊公前利州轉運判官通直君之命舉葬於江都縣東興鄉馮家原先塋之右域卜用明年正月己酉襄事吉出其叔舅右侍郎中穆甫狀邀銘於所知予與張氏世姻也而通家有舊故誅行載筆得其詳焉夫人系出錢塘以曾祖吳越國王諱侖始葬會稽子孫遂占名數於彼祖諱易翰林學士累贈太尉考諱彥遠起居舍人知諫院贈工部尚書母濟陽縣太君丁氏故相晉公之孫女也初夫人之姑真寘縣太君既歸張氏為太常博士集賢校理諱宗古之配不幸集賢早世尚書念女兒之婁居故以夫人許嫁其中子升卿公翊即通直君也將有行尚書識之曰爾姑吾之同產爾往事之如母而恭勤有加焉可也於是士大

夫家稱錢張之睦加於人一等矣夫人資素敏慧不類常女其就傅也自垂髫迨笄總習組紉隸文史至於筆札書記之事過目則善焉故二親奇而愛之其執笄也每念矜禱之戒不以親貴自別酒醴饋食皆有節適服動左右幾二十年始卒無異故皇姑安而稱之其主饋也內肅閨門外奉賓祭方其初官資薄躬率節儉以周其乏無少慊者又為收恤族中孤女教養贖給歸之士人人皆稱其孝而慈也其教子也手繕經籍而授大義漸劇誘導至於成人故諸子游場屋取世科薦舉學官名試中選皆遠見之時論以謂後必有顯於世者其治已也內恕而外通平生未曾有疾言大色始通直君職監司進擢甚寵一日坐論事同其使者奪官罷免命下甚遽初無知者眾駭異不知所圖而夫人處之晏然惟趣左右辨嚴即日就道浮江湖崎嶇數千里還維揚寓舍輯儲峙為久安計與夫子絕甘分少如是五六年內外不謂其為遷謫也夫人之材智明達大概如此又以早失所怙盡孝於母氏常惋溫膏不時惟其起居之間雖在千里必浹旬一置郵書平安信反然後遑處間或相遇飲食已惟談內典論性理相顧怡然他日偶被重病歸省餘杭以就醫診濟陽憂甚親為和湯餌同起卧者累月夫人踉蹌不自安乃強起潔誠精禱於浮屠曰蕞爾之軀死不足吝顧念一旦先沒必貽親累願稽延歲月以

盡太夫人餘年則瞑目無憾矣已而果有瘳後幾年得濟陽疾報即涕泣料家事一二飭誠若治命然因閱曹溪壇經忽若有省悉召家人輩語之曰是不堅體妄幻非實家人輩竊怪其語不類未幾訃至不敢遽白夫人曰吾母其往矣吾已發於夢寐矣而若不以告何也及得書一慟而絕經昔方寤徐曰吾獲從吾母遊志願畢矣雖勉力成服而漿溢遠絕於口中外之慰問者一切謝遣如是五日嗒然而逝時四年二月初九日也嗚呼不撓寵辱不怛物化蓋志學之士有所不逮者而夫人履憂患不怵惕在困約如平居推理明分亦達識之所能安也至若愛親以存生聞喪而毀性此非智勇果敢之所能必至然所以能至之者豈純孝真哀之感自與天均冥會耶是必有辨之者故悉言之夫人享年五十二彭城之封從夫貴也子五人男四長即康伯也次康孫秦州司戶秦軍次康道康廣女子一適其弟之子魯望張錢通婚蓋三世矣銘曰

美矣錢張古之潘楊載世媿睦婦順夫良彭城之賢儻有言德主饋執笄婦似是式既齊寵辱復善生死昔以親存卒以親毀義盡母夫莫從舅姑銘此懿行貽於女圖

夫人陳氏故樞相文忠公諱堯叟之孫尚書都官郎中諱師古之女尚書駕部郎中贈正議大夫畢公諱從古之繼室也幼聰慧知書史年二十歸畢氏正議之祖文簡公景德初以德望相真宗為時名臣門風家範世載厥美夫人逮事其舅衛尉卿能盡孝敬人有稱之夫人曰昔我祖姑楚國夫人之事其姑祝夫人也辨色而起侍立左右未食不敢退嘗倚戶後以聽命久之隱其壁以成迹而不知也吾未及此豈可以言乎治家嚴而有恩嘗勉其夫子以義而安於賤貧正議嘆曰使吾無不足於小官者夫人之助也正議卒官壽春時諸子猶未冠家故貧置無所歸睢陽族人以書招之夫人答曰吾夫平生未嘗有秋毫取於人今死未久豈以妻子謾族屬耶竟不肯往遂家淮圻躬自紡績以自給又教其子以經史文章法書及近代名人善言懿行以資其學久益不倦嘗病目不能視一旦有異僧叩門告以後日福壽之數且言諸子賴夫人以立小疾不足憂也未幾目果復明其後三子並舉進士登科仲衍被遇神宗稍任要職在官勤瘁擢起居郎以卒仲游朝奉郎集賢校理應開封府推官判登聞鼓院餘皆有聞於時出入臺閣榮祿及親迭侍膝下流裔益廣皆如僧言於是人知畢氏之有母也始從夫封馮翊縣君後用子進德興壽昌二縣太君諸子既登朝贈其父官四品又請以所遷官為母郡

改封夫人曰汝必欲以此為孝當先嫡夫人故諸子用其言封前母梅氏為永嘉郡太君而夫人之號未及改也元祐四年四月寢疾壬子終於京師享年七十四子男六人曰仲連通直郎曰仲容終臨邛主簿皆梅出也曰仲偃承議郎次即仲行仲游次仲愈宣德郎皆夫人所生女四人長適進士孔宗堯次適通直郎田輔卿次適通直郎李調次未有行而卒孫男十二人曰彥曰况曰舉曰完曰純曰亮曰騫曰達曰慧曰棗曰沂曰老彥完用起居遺奏補太廟齋郎孫女十二人長嫁進士蘇象先象先予之長孫也諸子卜明年七月二十二日葬於鄭州管城縣馬亭鄉廬村以婚姻之好託銘於予嘗聞夫人六七歲時從其祖母邵國宋夫人入叅禁中章獻太后見其姿貌異指而問之賜以茶茗仲行元豐初預檢討官制因奉事便殿神宗皇帝謂曰聞卿母能治家訓子今年幾何仲行以實對上稱數久之非夫資稟夙茂行義素著則何以稚齒暮年動二聖之識賞惟其完壽康完福履子孫終養遺德不泯有由然也銘曰

將相之世生此淑女公卿之家乃得賢婦敬篤尊章義形夫子痛結未亡教勤反視果有令人振興舊門登朝授職弟繼其昆視之子賢識母之訓生事死葬禮時孝盡丞相之墓藁澤之陽夫人從之數世相望



仁壽郡太君陳氏墓誌銘

元祐二年八月戊戌翰林學士承旨通議大夫知制誥兼侍講鄧公母夫人仁壽郡君陳氏以疾終於京師某坊之私第公以憂去位兩宮軫惻翌日遣中使就第弔問法賻外別賜上尊百壺白金一千五百兩又詔所居州郡治公館處其家朝廷之所以周卹邇臣有加於常數其恩禮至矣越十月某日公與季弟主客郎中奉夫人之柩塗行泣血翼扶登舟泛汜渠涉淮泗抵維揚權厝於某寺即某所為塗廬初卜葬江西故里不食墨又卜丹陽乃食遂以明年七月某日甲子遷神座窆於某縣某鄉某里山居西南水流東北用姓氏之利也自初喪闋帷堂殯階序升轉車涉遠道反幽宅至於復土無不如禮者君子以謂事親之義於是盡矣夫人世占建昌軍南城縣生而警異父處士諱求母南昌范氏奇其早成為擇良偶久之得同郡鄧府君諱立篤學有鄉行為士友推挹遂以歸之府君方力行養志不厭寒苦以德義自信於鄉里而夫人躬服節儉勤勞內治事姑章敬以順接娣姒和以莊待宗戚仁以睦歲時之祭享不以菲廢禮閭黨之賓客不以貧闕供故得盡內外姻之歡心以成良人之美志府君即世夫人年且少嘗有未亡之歎誓不他從服則蔬麤食則菜糲以詩書教子以組紉訓女傅保之事必親臨之比及

成人有如宿習長子元父好學多聞不幸早卒次日溫伯即承旨公也次日仲父  
隱德不仕省臺諸公前以逸民薦之季曰義叔即主客公也儒雅有吏幹擢在清  
要昆弟既登朝追贈府君為光祿大夫而夫人方在色養自壽安縣太君再進郡  
封承旨公遭遇神宗嘗為御史中丞坐言事謫守臨川親知或為遠適數千里必  
貽親憂夫人聞之曰言不用而去乃其職也即日趣行愴然無戚容其後昆弟同  
在朝廷禁林天臺相繼進用鼎茵在前左右視膳孫息環待怡怡如也士大夫之  
仕弗逮親者莫不榮慕焉夫人年八十有二平居強食飲自若一得疾則語諸子  
曰吾病革矣我視死生猶夢幻曷足為爾輩累乎其終也偃然若大寐而無戚怛  
蓋康寧壽考加之執德不怠其五福之具者乎二女嫁朝散郎陳光道某郡進士  
黃珏七孫曰景雋南安軍大庾尉早卒曰之純之敏並承務郎之邵承奉郎曰某  
曰某未仕者皆少而有立能承世學予與承旨公遊且二十年矣每登門聞夫人  
起居動止嚴而有裕成就門伐蓋家訓致然今又克葬京口與我先壠同一郡內  
諸昆弟是為所居里人其義固益親且厚矣因得紀夫人之行義以銘墓石抑嘗  
聞善葬者言潤之土厚宜封殖其水深宜壙穴塋於此者百世之固也夫人內行  
夙著諸子送終盡禮果得吉土以寧神宅永錫爾類其在茲乎銘曰

婦德之茂孰先母儀化由風始治以家齊纜鉉君臣著乎閭閻幅軸將相見於杼  
機維若仁壽好古知禮聞門睦宗徒鄰訓子子以母賢母以子貴濟世宜家孝慈  
兩遂顯顯諸子名稱暴聞或出或處不違其親青練紫綵後弟前昆疏封奧郡終  
養高門彤史古職具載言德我刊銘章納於幽窆京江北流岷山東直桑海或遠  
音徽無斁

福清陳氏墓誌銘

夫人陳氏諱池安贊善大夫知循州諱莊之女寧國軍節度推官福清王君諱碩  
之妻其先世占籍光州固始唐李避地徙閩今為福州羅源人贊善乃信厚長者  
遠財好義又有文稱擢祥符元年第後調池州青陽尉實生夫人故以州命名母  
福清縣君范氏獨一女二親無所分其愛故拊育尤至自緝而并姆傳勤誨有以  
成其謹飭之性焉既擇嘉配乃歸王氏夫才婦順遂宜厥家事姑能適其志周旋  
族屬上下皆得其歡心節推君困於州縣夫人數寓他州躬服勞苦先之以儉約  
親戚有以貧來告者隨家之所有以賑之至奩珥無存者亦不以累意也處閨門  
訓子姪如其家法故子姪承其教皆有學藝以至於成立焉享年六十有一以熙  
寧八年六月丙辰疾終於丹陽仲子之官舍後二年春二月丙申葬湖州烏程縣

九元鄉西賢村帆檣山之南原節推君先六年卒既葬矣至是合祔焉禮也子男三人長伯夔舉進士次仲龍潤州丹陽尉幼季稷早卒女八人適長泰令林開徐州司法參軍朱炳進士楊價彭璉餘杭尉陳公佐進士劉績邵旦吳勳初夫人常以贊善君喪久不得葬為憂迨病且革語不及他事惟以此屬家人曰我自為若家婦無一不足者獨二親旅殯數十年畢生之痛無甚於此若輩能為我擇日月以禮襄事吾瞑目無憾矣諸孤泣血奉其遺戒嗚呼夫人有子矣若節推君之行則有侍御蔣君頴叔之誌在焉此獨敘夫人大畧云銘曰

幽閒慎靜女子之行和柔孝慈是謂姆師婉彼夫人亦允蹈之既明且智彤史之貽閨門雍雍姑嚴婦恭夫榮厥緒子紹其宗胡不壽考遽絕音容帆檣之葬良人是從

蘇魏公文集卷六十二終

蘇魏公文集卷六十三

宋太子太保右僕射同中書門下平章事司空魏國公蘇頌撰

逢年

裔孫萬靈重禁

行狀

耀庭

朝請大夫太子少傅致仕贈太子太保孫公行狀

公諱抃字夢得其系出於富春蓋吳將武之後裔也七世祖曰朴始徙富春籍於長安在唐宣武世舉進士宏詞連取甲第大中五年從辟劍南西川節度使杜悰府為掌書記其子曰長儒攝彭山縣令既以秩滿罷因家眉山太治居處又構造重樓以貯書日延四方豪彥講學其間於時蜀人號為書樓孫家自爾子孫不復東歸遂占眉山名數高曾以來歷五代喪亂晦遁不出力田以自給取足而已不求贏蓄清白之範其來蓋遠矣公初名實字某生五歲習為詩便有老成風格其警句往往傳於人口未冠作祥符宮賦五千餘言成都尹凌策聞其美才召至府與語甚奇之將薦於朝以其年少而止其後累從進士乃更今諱天聖八年春再上拔鼎科一命大理評事通判絳州軍州事初大師在蜀名知人生五子待

公獨異嘗謂曰爾器韻沈遠後當顯赫於時但成名差晚吾不得一見為恨耳至是太師已薨謝而公每因拜官則感涕愴慕累日痛不逮養明道初恭謝推恩改著作佐郎未幾召試學士院進太常丞直集賢院監左藏金銀絲綿疋帛庫以祀國太夫人喪去位公在眉山為大族中外戚屬以百數而貧無依者又眾聞公歸皆來取給公竭資以贖其費又為之娶婦嫁女者數家服終還臺判尚書祠部擢為開封府推官賜緋衣銀魚居歲餘府胥馮士元以姦贓敗窮治甚急事連前後尹佐自二府至臺省者十餘人而公無分毫絀累由是清慎之譽聞於時考課陞太常博士移判三司開拆司兼提舉催驅公事同修起居注慶曆二年二月召試中書換右正言知制誥占謝曰賜金紫服判登聞檢院權知審官院遷起居舍人兼判尚書刑部出疆為賀契丹生辰國信使公為人端重不妄舉動言語與敵人接有問乃答敵人尤加禮奉且謂人曰孫公真恬靜篤寔之士也使還判國子監權糾察在京刑獄五年二月召入翰林為學士判太常寺兼禮儀事權判尚書都省磨勘諸道轉運使提點刑獄課績充宗正寺修玉牒官六年春權知貢舉再遷尚書禮部郎中遭所生母崇國太夫人憂援近例願終三年喪優詔從之公除召還復舊位提舉在京諸司庫務皇祐二年以太饗明堂恩轉吏部明年兼侍讀學

士權判流內銓知通進銀臺司兼門下封駁事五年五月以右諫議大夫權御史中丞制下諫官論奏公朴謹非糾繩才不當居此官公即日手疏自訟曰臣觀方今士人趨進者多廉讓者少以善求事為精神以能許人為風采掇給若嗇夫者謂之有議論刻深若酷吏者謂之有政事諫官所謂才者無乃謂是乎若然誠臣不能也仁宗深察其言詔趨赴臺視事尋差知審官院公辭以臺長不可兼事局恐於言責不得專詔如其請仍著為永式再加給事中公踐兩禁十二年朝廷得失天下利害事非所職者未嘗建言亦不與人談議或謂其循嘿公曰事有分齊豈可越職橫說及為中丞每聞朝廷有措置未合理者與人言有不厭者及羣臣爭之未見聽者皆即時拜疏或請聞言上再三開陳得請而後已人由是知公韞積厚而操守固也是時內侍王守忠以在事累久特恩遷領武寧軍節度使公奏言自唐以來節度使為將領劇任專制軍事國家安危成敗之所繫非中官所得處其任曩太宗世王繼恩平劍南有大功當時論賞止於進順州防禦使別立宣政之號以寵之况守忠無繼恩之功而輒居將帥之任恐為四方非侮則國威沮矣朝廷卒為之追改成命至和元年春貴妃張氏薨仁宗傷悼即日追冊為皇后賜諡曰溫成且有建陵立廟之議公言茲事體大宜命近輔與禮官參議然後施



行不當虧紊典禮又合諸言事者共爭章至十餘上輒留中不報他日率同列進見帝不為顧遂列拜於御座之側公獨伏不起久之帝乃語因復得進言不可之狀而忤旨益甚左右股栗有欲仆地者公凝立不懾帝亦為之改容而遣之當時雖不盡用公等議然其後罷立忌去廟樂改園陵使為監護葬事車駕幸奉先寺不入廟致奠皆公啟之也明年秋丞相陳司徒女使死移開封檢視有瘡痕傳言嬖妾張氏笞殺之事以聞上詔近侍置獄推劾追取證左皆不至既而趣上案遂罷獄公十上疏論其悖謬曰大臣筆殺女使事至微未然而詔獄廢置皆用執中之請此於國體大有所損何則執中要行則朝廷雖近侍之臣亦須遣去案問執中要罷則本家僕妾之類不容略行追取挾恩怙權取必於上此而可恕則孰有不可容者司徒卒緣是罷政事而公亦連上章求解臺秩出補外郡優拜翰林學士承旨貼侍讀修撰之職仍領太常禮儀都省兼提舉醴泉觀公事又遷尚書禮部侍郎兼判昭文館再修玉牒公在臺滿二歲凡言朝廷天下事章數十上大指以持紀綱厚風俗辨人材寬民力為先急未嘗搜抉人之隱慝小過與不可明白之事其論大體若言古渭州不可復置以失信於外邦而啟其窺覲之心凡邊防疆場之事當令兩府通議議定然後奏稟施行無令舊相守邊恐事體太重則番夷

致猜藩方無得辟通判官以全兼郡故事方無事時宜預擇兵官則緩急有警可用近邊土兵可因舊名而稍增其數則幹強而枝附此其尤著者疏入多即施行或著為令其餘或行或否或密疏不傳者不可悉知也其論人物若云楊畋有文武幹州郡不足見其材宜擢近職置之湖嶺間藉其威名以靖徼外張昞之清方有器識心計絕人宜召對便座詢以時政得失及財計利害必有補於朝廷胡瑗孫復博通經術可任以講勸之職趙瑜劉貽孫世授兵法可委以邊防之寄盧士宏知漢州薛向知鄜州皆有善狀或清介以得人心或幹敏能捍大患宜俱陞以繫劇刑獄之任則廉吏知勸而才臣思效曩者王益柔楊南仲陸經齊唐葛閣輩皆以纖芥之累久妨進用失棄過獎善之義望與滯滌任用則清時無遺賢之謂是數人者不久朝廷擢任幾盡時論咸稱其器識焉三年春仁宗暴得風眩不豫罷朝禁門晏開者幾旬日雖執政大臣亦不得進見但通名於內東門參候起居止於中使宣諭聖躬漸安而已庭中惶惑莫測其端公時為近臣班首因率同列就幕幄中見宰相曰主上違裕臣子當朝夕省問今大臣隔絕不得見是上之安否虛實未可知也事繫宗社諸公不宜坐以待命宰相即用公言叩關請入禁中侍疾由是中外之情稍安未幾詔兩禁雜議權磁湖鐵冶事議罷奏藁已具而司諫

吳及監察沈起重更定數字同列意二人者有所挾即時劾奏其事吏持案曰請名於公公曰二人者信有罪矣然我輩從而舉劾不亦傷風誼乎及起卒坐是出補外官後帝聞公嘗有是語曰老成人終不同嘉祐三年契丹國主宗真卒遣使告哀公為館伴使先是宗真之使來敘兩朝通好歲久請交贄御容欲使子孫得識聖人形表朝廷初不能奪其議既許之矣異時契丹使先以畫像來未報聘而宗真殂歿新主復遣使來請朝論以先主時事欲卻不與公遽至中書白曰國家懷柔遠方所仗者信義而已且彼以好來求聖容既許而不與其失在我不在彼矣或曰不許之意有人臣難言者直慮強隣厭詛不道耳公曰此特巫師女子之談非所以折衝銷難者也况聖人應期運繫天命乃反有所畏耶且彼一來不予至於三四極於十數朝廷度終能拒之乎其後以使者再至乃予之如公之言公領太常前後幾十年言禮事甚衆每有大議則使諸博士各陳所聞見然後擇其合於義理者裁定而奏之太抵守經據古不欲輒有更異初仁宗追憫故后郭氏以微過廢卒久無祠所詔於景靈宮建神御殿歲時追享上封者言神御不當建或曰當祔於廟詔并下禮官公與僚屬同執非是而獻議曰先朝建立神御殿已是非禮然由尊奉祖考不失孝思之義今為后妃而置之其於失禮又甚倘

陛下追念郭氏殂謝况已追復位號不若因而賜以謚冊祔于皇后廟則恩意至而典禮存焉復下雨制合議久之未決然卒罷神御不建四年詔將用十月祫享於太廟羣臣有建言皇后廟四室先時每遇禘祫升於太室蓋有司攝事失於尋討今皇上躬行盛典義當革正又引唐郊祀錄續曲臺禮為據請遣近臣致享如奉慈廟公即與二三同列奏駁以謂春秋傳所云未毀廟之主皆升而合食於太祖有別祀事乎又曰祭從先祖后廟合食自祖宗以來行之已久不宜用疑文偏說輕有更改况天子甫欲齋戒固當奉承先憲正所謂有其舉之莫敢廢也時論者紛然諸博士亦是上言者中旨用公等奏為定合食如舊明年日蝕正月朔旦詔公禱祠於太社公舉春秋經傳文止用幣而去牲又伐鼓以責陰氣時宰稱其得禮公久在禁庭主春日厚每燕見所聞問必端簡而前曰天子所以享南面之尊延十年之慶者惟兢兢可以對上穹惟勤儉可以惠下民止此而已未嘗一語涉面諛朋比者至和中帝切於求治嘗問前代之所以治與其所以亂公從容言曰臣以謂治亂之由無他故惟在用人而已得其人則治失其人則亂從古然也帝曰今世非無賢又非不用然而治不及古何也公曰有賢而不用與無同用而不盡其才與不用同惟明主留意則賢無不用而世無不治也帝曰今之賢而未

用用之而未盡其才者誰人乎公曰知臣莫若君此必上簡天心非下臣所敢私論但願陛下不以一事不效而遽去之則賢才無不為陛下用矣帝再三嘉納之是後數進退大臣復用宿名重望已更任使者大厭羣議帝由此益器重公遂有大用意是時程延州戡用臺官言罷樞副宰臣進擬例以三司使御史中丞知開府一人補其員上曰朕思得舊人之久職者既而語及公命即以本官充樞密副使同修樞密院時政記時嘉祐五年四月也其十月知辰州竇舜卿以定彭氏蠻事朝廷喜其能議遷一官公曰唐開元中所以號太平者以不賞邊功也今舜卿信有才他日進擢無所不可若用蠻事遠職誠恐邊臣生事於隣敵以希恩賞以此四境不得安息也遂止降詔獎諭之上書者請嶠外增置土軍為南寇備公曰苟取其知山川鄉導則州得百人可矣如增廣其數徒糜廩庾費其實不足以待敵前日智高之亂成功者乃陝西騎兵耳南軍何預焉率仍舊不復增置公為樞密不盡八月以本官參知政事同修中書時政記都大提舉三館秘閣公事同譯經潤文一日政府集廳議擢李參為三司使公時以故後至預聞之徐曰方今民困弊久矣宜得敦厚而有學術之人使主邦計庶幾可以寬民保衆苟急於趣辦應猝之才則誅斂倍克無所不至如此民何所措手足乎前議遂格明年御史摺

公過失不當久在政事章入不報或有謂公曰事起無名盍自辨於上公曰吾老矣退乃其分自念平生不欲攻人之短今幸得備執政不能敦厚風俗宜有愧矣而反欲與新進士競口舌於上前耶况知我者君此曹其能誇我乎遂疏求罷帝益嘉之超拜觀文殿學士兼翰林侍讀學士同羣牧制置使公在講筵前後十三年故事凡進讀羣書前代亂亡忌諱之語皆掠去不解公以為不然每至其處必再至敷衍且曰茲事所以書之於策牘者示來代之明戒也苟臨文避諱則書傳載之何用自是遂盡讀無避明年夏今上即位改戶部侍郎治平元年二月以太子少傅致仕於是公年方六十九將還政之前有語公曰禮七十老而傳人或過之而不去公乃未至而告休斯不近於矯時乎公曰強力而仕不能而止士君子之通義也奚必年至而後去乎遂連上表得請以其年十一月初六日薨於其坊之私第上聞訃為之罷朝垂拱一日制贈太子太保法賻之外再遣中使賜黃金百兩以卹其家恩錄其子孫洎異姓若干人公為人內方外溫動由至誠不喜矯飾以邀取名譽然而端嚴謹重至老不懈雖少年強力之人殆無以過與人無適莫亦不肯苟合端居似不能言者及遇事則毅然自信不為高下易其心初在翰林嘗至中書白事繁難登政事堂時陳司徒作相見之不悅且責廳吏不以告公曰

學士見宰相以客禮自有故事况某以公事來若有私禱則足恭下顏所不憚矣  
司徒不能平及為中丞司徒復冠臺宰每裁處大事多出獨見同列無敢抗者公  
屢言其失曰幸陛下以臣章示執中使之凡事須眾論允協然後奏白行下司徒  
見章益不喜一日賜燕都亭驛坐席俯相近酒間司徒微語公曰觀中丞日近封  
章意頗不見容老夫耄矣行當引去因指其座曰此中丞即日之地幸無亟相侵  
也公俛首不答退而語人曰陳公之言甘其心可見也未幾會詔獄起卒用公言  
罷相及其薨也太常定謚博士以其當國日奉行貴妃冊禮及不能正溫成贈葬事  
請謚榮靈公曰司徒端方剛勁素聞於時自為小官已有建儲預政之策作相雖  
無謬謬之譽然其至公不黨亦近世少及加以惡名誠為太過謚曰恭可也博士  
又曰謚者節一端美惡宜取其大者今司徒之過顯雖有疇昔之善不能掩也公  
曰不然程丞相圖武后臨朝事以說章獻此豈不顯耶而不失美謚司徒有是乎  
或曰公昔日屢疏其短而今誅其善何前後之不類也公曰宰相越法予為中丞  
言之職也死者美惡予在太常謚之當以至公豈可挾一時之事而廢其平生之  
大節乎復持議如前後請於朝覆議者數四卒以公言為定其持心平恕如此臨  
事周慎謙畏又過人遠甚自歷兩禁至登二府四方問訊有非時至者輒藏去不

啟封曰此必有求於我自度不能副其情不若勿發之完也亦不妄與人緘牘或  
必須為之無高下親疏皆手書親爰雖疾病亦不假請於人書體端楷嘗謂章草  
近於輕佻故不為也非公事稀歷權要之門至於儕輩往返亦有時故在朝與相  
親者無幾人一受人之知造次不忘於心初聞吏部張文孝公薨哭之終日不已  
子弟輩疑而問之答曰吾自立朝未嘗有相推引者惟張公拜觀文學士曰表我  
自代此知我者也今其忘也故至於傷慟耳於相知猶爾於朝廷可知也性尚清  
簡自少惟讀書為文餘無他嗜好音律棊射書畫之類無一留心者晚年亦稀復  
佔畢文章論議則平昔所學皆自足用其所接賓客惟儒生士人其外技藝緇褐  
卜祝輩無一及門者居無事時獨坐一室移晷不出妻子亦罕見其面尤惡談人  
是非有來言毀譽者則答以他語去乃指謂人曰巧佞之徒宜禮而遠之慎不可  
聽其言也接人至簡約不事屑禮或時供具酒不過七行家人以為不可公曰古  
人三爵吾已過之何謂不可素不善治生產在貴近日久所得俸賜甚厚隨入隨  
費婚姻葬祭外則以均贍宗舊故家無餘資室無玩好京城無善邸第後房無姬  
媵其所以奉養之具宛若寒素或勉以為子孫計者公曰吾為子孫計豈不足耶  
幼而教之詩書長而任以爵祿若而曹但能忠於君孝於親義於宗族廉於公家



不為姦欺儉險之行守此足以保數世安佚矣及還政家居惟幅巾野服與賓客談醫藥修餌之說不復語他事其風尚可見矣公累階朝散大夫勳至柱國封爵為樂安郡公食邑三千三百戶實封六百戶公仕宦過三十年未嘗有毫髮玷議論多闕略細故務全體要所上章奏無冗長虛飾之詞其言至質略有意味切當奏對語直而實故人主以朴厚目之以此頗見信納前後八被詔獄囚徒開引情實白於上前有殊死而得未減者多矣平生喜薦士得人最多其薦御史得今中丞唐公天章吳公皆一時之傑自餘顯言密啟者蓋又多矣屬文簡重不務刻摘章句於訓辭尤為得體慶曆初夏英公自蔡州以樞密使召至闕諫官連疏其短追寢恩命移判亳州到職上表自辨付學士答詔諸學士皆難其辭公即取筆作草上之有弭謗言莫如盡忠勤之語諸公伏其切於事情而英公銜之尤深至語所親曰予與孫公素無嫌而批章見詆如此公聞之亦不以為悔其他大手筆則有升祔獻懿二后赦文初進崇仁宗讀之至為天下母育天下君不迨九重之承顏不及四海之致養言念一至追慕增深為之歔歔稱嘆者累日又奉詔撰寇萊公旌忠碑丁文簡公崇儒碑敘事明白氣格渾厚自成一家之體有文集若干卷藏於家公娶太原王氏封某郡夫人同郡大姓也三姊皆適土豪生子者又相聘

娶公以儒者獨不得繼好貴而三家者始來以求婚公亦不拒又為之保任其子及孫入仕者數人於是鄉人益稱其長者少孤兄弟羣處惇睦尤至他日析居公盡推美田宅與諸兄惟取其薄惡者曰數口之家得此足以奉先人之宗祀矣與朋友交得喪休戚一以均之初舉進士時善厚屬郡宋輔洎拔州解同時東上至長安輔以疾不能興公亦留止為診醫藥過浹旬輔曰試日甫近子當急往毋以我為累也公曰與君偕來義不得先君若罷舉我亦與君俱西矣又數日輔疾愈遂俱行並擢第此又見其內行之有素宜乎爵茂而寵優也子男子四長曰珣國子博士次佑輔大理評事早亡次詰次林並太常寺太祝女子四長適戎州楚道縣尉蒲獻卿早亡次適太子中舍彭敏行次適尚書都官員外郎句諶次適太常寺太祝宋奉國孫男子七人五為京司及試街官二未仕女子五人二已出適三尚幼男子皆謹厚能守家法女子俱從名家仕族可謂有後也某獲游公之門有年數矣又嘗辱稱薦於朝以恩舊故熟聞公之緒言美行今又得其孤所錄遺事甚稱謹紬次始末直言以上有司謹狀

無委之文集  
卷之二  
同安裔孫萬靈錫經

逢年舜明

晉爵耀庭

允恭子敬全枝宇